


95087





書	
号	
函 6 册	
登录号 68882	

西莊先生文學天下稱之然人之所以稱先生者  
皆非先生志意之所存而先生之所為好學深思  
而深造自得者人固莫能窺也自有宋諸儒倡明  
道學元明承之義理大闡而漢唐經師章句訓詁  
專門家法漸以衰息我朝諸先輩始復留意蓋虛  
言告退實學肇興儒林之盛軼前古矣先生最後  
出以高明伉爽之質用沈深顛實之功自其少時  
固已橫鶩別驅踔厲風發中年以後超乘而上譬  
諸撒籓垣而洞房奧脫鱗介而生羽翮蓋嘗上下  
二三十年深思夫通經學古之所由知義理必從

考據入未有考據舛而可言義理者聲音文字象  
數名物探蹟鉤深久之得其竅繁漢人之傳注唐  
人之義疏盡能通其旨要夫是乃博之以理趣而  
溢之為文章洋洋乎左右逢源而初未嘗欲執筆  
學為如是之文也嗚呼先生之好學深思深造自  
得夫豈薄殖幹才虛鋒漲墨摩擬剽竊捫壁扶墻  
者所敢望哉先生之學邃于經而平生精力尤在  
尚書所著後案六十卷表微存逸截斷衆流其他  
雜著又不下十餘種略皆具稿可繕寫美哉博且  
精矣夫文章必本于經術夫人而能言之然文人

治經不過約其綱宗撮其崖略薰染其芳臭氣澤  
而已若章句訓詁固有所未暇及而守訓詁家法  
者又往往膠葛重脰無以自運而不復措思于修  
辭是以文人與經師常不能兼也先生獨能兼之  
先生豈遂能盡掩前人哉蓋亦適會其時而去短  
集長以有此也若乃用韻之語獻酬之作摘華揆  
藻皆其餘技而世顧艷稱之抑末矣近日鄭寒村  
序黃南雷謂其即文即道計改亭序汪鈍菴亦有  
合經與道與文而為一之說予謂士生宋元明之  
下所難正不在論道患無學耳以實學為文合經

與文而為一先生是也予小子承乏詞垣于先生  
為後進因得從遊門墻之列茲先生文稿初刻方  
竣敬舉膚言挂名末簡聊致區區嚮往之私云爾  
乾隆乙酉長夏受業門人宣城張燾再拜謹書于  
廣陵旅次

予束髮知慕先生名楚吳相去三千里不獲親承  
餘論庚辰忝與館選辛巳謬領史職念經師之難  
遇急往奉贄受業門下先生之門賢士所湊如予  
何足比數而先生雅好接引後進每相見晬乎其  
容藹乎其言談道講學上下古今移日分夜不倦  
乃嘆先生之學非流俗之學先生之文非流俗之  
文也從來著述家必讀萬卷書行萬里路然居而  
絃誦出而遊覽事每相妨及其筆之于書則又有  
臺閣之體有山林之製分鑣異轍而各不能以相  
通有人於此汲古之功深游覽之迹富登臺閣而

心超乎纓紱之外居江湖而情寄乎煙霞之表斯固扶輿英泚之氣之所萃而斯文之統緒將于是乎繫焉人即有忌之者能齟齬其身名而終不能掩抑其文學如此者蓋亦代不數人矣若先生非其人與先生稟絕異之姿弱齡負大名而浮湛隱約困於舉場者二十餘年客授在外吳越燕齊楚蜀行歷幾遍已而擢上第為史官受聖明特達之知典著作之任釋褐甫五載兼掌兩制入參政府禁中呼為才子見者望若神仙一切應奉經進之作日以益富銜命奉使星軺所屆搜竒

攬勝又嘗扈蹕近畿及塞外持衣橐筆出入屬車豹尾間江山之助益多未及艾而循陔養志蕭然遺榮扁舟釣具倘佯湖山間泊如也綜計生平三十三而登朝四十三而退處其所閱歷者如此殆真能兼探讀書行路之勝而奄有山林臺閣之長者哉先生淡于聲華而濃於德業廉于干進而貪于文章勇于績學而怯於梯榮密于窮經而疎於逐利目耕肘抄手胝口沫船唇鞍背未嘗一日廢書經史而外百家九流靡不貫綜山經地志斷碑殘碣之文靡不蒐獵爬梳剔抉中襍外視彼

西華如存和  
蕭序  
潢潦蹄涔之水有時汪洋一瀉都盡冬月唐花藉  
火力催發入春便黃萎者詎不相逕庭邪夫以先  
生之所成就較元之虞伯生黃晉卿柳道傳明之  
宋景濂王子充歸熙甫王道思輩其為波瀾之廣  
陋戶牖之淺深固非予等門下士所敢妄議要其  
函雅故通古今扶質立幹垂條結繁卓然為我朝  
一大宗洵無疑矣世之人擾擾馳逐以終世所辛  
苦而塵得之者回觀先生殆不啻劍首之一映矣  
今而後當思先生之榮遇此有命焉不可必得至  
于先生之學則固自有僉徑之可循有階級之可

陟後之君子宜何如其興起也乾隆三十有一年  
歲次丙戌春二月既望受業門人漢陽蕭芝頓首  
謹撰

受業門人同編校

長洲程 琰 長洲蔣業晉 元和顧宗泰

元和袁 照 元和李大夏 吳縣范來宗

吳縣潘元振 吳縣陸 晁 常熟蔣元樞

吳江金學詩 吳江陳元文 吳江翁純禮

震澤楊復吉 太倉李夢荃 奉賢顧鴻志

婁縣汪 熙 金山劉 濯 上海朱 霞

青浦徐鄰坡 無錫雷 晉 丹徒鮑之鐘

江都閔士龍 甘泉張兆熊 儀徵施朝榦

興化任大椿 寶應喬方立 寶應湯應隆



寶應劉兆彭

寶應劉玉麟

寶應喬大鴻

泰興桂禮順

歙縣洪朴

歙縣洪榜

歙縣程世錞

休寧汪鳴珂

休寧程雯

宣城張燾

錢塘張坤

錢塘戴奎

錢塘汪蒼霖

仁和吳琦

仁和趙承熙

秀水蔡忠立

秀水李大恒

嘉善曹永楫

平湖陳朗

烏程姜宸熙

烏程宋維藩

大興邱桂芬

正定梁用梅

大名成倫叙

漢陽蕭芝

永定沈揆熙

建寧李大儒

鄉會分校典試所取士不入門人之列

西莊居士始存彙總目

卷一

古今詩八十首

卷二

古今詩二十九首

卷三

古今詩六十首

卷四

古今詩七十首

卷五

古今詩四十二首

卷六

古今詩九十首

卷七

古今詩九十首

卷八

古今詩七十一首

卷九

古今詩九十三首

卷十

古今詩一百三十首

卷十一

古今詩五十三首

卷十二

古今詩三十七首

卷十三

古今詩四十四首

卷十四

古今詩三十八首

卷十五

卷十五 序十首

卷十六 今稿三十六首

卷十七 序十首

卷十七 今稿四十四首

卷十八 序十三首

卷十八 今稿三十七首

卷十九 記九首

卷十九 今稿五十三首

卷二十 記八首

卷二十 今稿一百三十一首

書二首

論二首

考一首

卷二十一 序一首

辯四首

卷二十二 序一首

題跋二十二首

卷二十三 序一首

題跋十八首

卷二十四 序一首

卷二十五 題跋十一首

卷二十六 疏一首

卷二十七 劉子一首

卷二十八 表二首

卷二十九 策問五首

卷三十 策一首

卷三十一 卷二十八

卷三十二 頌六十八首

卷三十三 賦四首

卷三十四 卷二十九

卷三十五 墓志銘七首

卷三十六 塔銘二首

卷三十七 行述一首

卷三十八 像贊二首

卷三十九 哀辭二首

卷四十

卷四十一

卷四十二

卷四十三

卷四十四

祭文一首

卷附

長短句四十一首

右斷自癸未以前合少作及宦橐共詩九百二十七首文二百十八首釐為三十卷目曰始存橐癸未之歲予四十有二奉母諱南歸自服闋後所作別為晚拙橐會坊人堅請始存橐刻諸木勉徇其意付之此外已刻者周禮軍賦說未刻者尚書後案皆各為書不在橐中云西莊主人自記

西莊始存稿卷一

古今詩 耕養集

短歌行

有白者華被彼崇岡莫養二人慨當以慷解一豫章

出地其根已深生年幾何猶有童心解二我瞻四方

使我心惻素絲易染岐路難識解三爰采杜蘅將貽

所思道里遼遠山川間之解四言膏我車載馳載驅

前路漫漫我心則憂解五我心則憂忝我所生慎修

我躬庶貽令名解六

矯志篇



牆上難趨貧賤難工昨日健少今成老翁長繩繫

日晚晚莫從壯盛智慧殊不再逢俯仰天地悲來

填胸解一驂騮捕鼠乃不如狸鳳凰司晨乃不如雞

秋蘭雖芬鮑肆間之明珠在泥皎皎何為拔劍起

舞拂衣旋歸解二左控夏服右操黃間趨趨狡兔掩

以修竿鳴儔嘯侶促坐為歡投壺六博飛爵闌干

清歌激楚妙舞娑盤解三思慕王喬研精耽道乘躋

遠遊經歷深杳仙人授藥還精補腦棗實如瓜桂

實如棗排棄火粒後天而老解四典冊法書藏在蘭

臺珠囊金匱繁露玉杯姸彼羣雅苑其鴻裁藏山

入林蹈海鑿坏百世有知以俟方來解五

詠懷三首

中宵拔劍起憂懷浩漫漫丈夫自有志窮賤奚足

患我憂無可解亦復無其端啓戶獨傍徨攬衣忽

長歎仰視河漢明衆星羅高天蟋蟀似知秋淒淒

鳴草間沉思永今夕悵望誰與言

大道日已遠人各營其私直以有我故彼此還相

嗤相嗤復相慕不知誰是非鸞鳩捨枋榆鯤鵬翔

天池吾將蹈滄海寥廓以為期

行者艱莫休居者方笑歌諒無同心人結友何須

西華女不稱 卷一 二  
多小人貴苟得君子空蹉跎歲暮悲風來嚴霜凋  
庭柯登高望八荒山谷鬱嵯峨盛年不可再太息  
當如何

發金陵

驃騎航南路青驄驟玉鞭悲笳千里戍斜日萬家  
煙鄉夢浮雲外秋風旅雁邊江山共搖落回首意  
茫然

早春荅錢坤一徐穀函見寄

梅花明岸雪春草綠山橋天外瑤華至夫君神理  
超仲文雄大歷孝穆壓南朝同是悠悠客相思一

水遙

旅次對雪

正月今年雪飄蕭打客窓春風吹細草寒水落空  
江盡日歌烏帽狂歌醉玉缸綠蓑仍好在擬上釣  
魚艫

采蓮曲

江南煙樹何平遠曲渚澄潭漲痕滿木末纔看薜  
荔披蓮東已見芙蓉展誰家少婦各相將星靨妝  
成飾玉璫越吹江謳傳水調蘭橈桂櫂出橫塘橫  
塘初日開清曉田田蓮葉迷芳草翠蓋擎來見戲

魚紅衣摘處連輕藻鷓鴣鷓鴣漾晴沙鏡裏薰風  
似若耶儂家最愛連根藕女伴偏拏並蒂花蓮花  
蓮葉平波動綠萍金粟飄香夢柔櫓初迴渡口船  
清詞歌徹江南弄此時蕩子暗驚秋鴈塞蒼茫憶  
鳳樓扁舟漫說江南樂遠道還生塞北愁江南塞  
北愁難度碧池菡萏悲遲暮墜粉無端恨較多連  
絲不斷情如許一片涼颼起白蘋迢迢捐珮托文  
鱗涉江欲訴相思苦不惜瑤華寄遠人

烏夜啼

長楊宮晚扃魚鑰妙舞纖羅迴袖弱蒲萄香泛金

鑿落茱萸帳煖明珠箔哀絲欲沉燭影微捲簾啓  
戶露濕衣牛女爛爛天河低繁霜著樹烏驚啼

讀曲歌

有酒嚼復嚼懷人山上山菖蒲空作花黃葛何當  
還

那呵灘

棹舟那呵灘樣舟日已暮遙聞舟子歌盡是懷鄉  
句

長信宮詞

昭陽隱隱聞笙歌御柳初凋太液波別殿秋來宮



漏靜玉階明月夜涼多

題畫

冷翠散遙岑蒼煙出遠樹巖間雲忽興化作巖下  
雨溪邊古仙人櫂舟往何處

贈吳牧園先生集杜句二首

經術昔相傳才名四十年詞華傾後輩鐘律儼高  
懸回首驅流俗歸山買薄田本無軒冕意送老白  
雲邊

弟子貧原憲諸公厭襴衡飄零爲客久寂寞壯心  
驚把酒且深酌幽居不用名昔承推獎分長嘯一  
含情

送吳牧園先生入京三十四韻

人倫歸物望大雅重吳興門第烏衣盛聲華紫籞  
承賜書髫歲讀遺笏舊家仍愛蠟青山屐閑攜白  
竹滕梁園羣對雪社圃劇分棚結客囊金盡摘詞  
紙價增碎琴驚慷慨射策遽飛騰籍籍三公薦英  
英兩府稱名先傑直吏官亞秘書丞簪筆芸香館  
分衣鳳尾綾仙曹才獨冠蘭署迹頻陞羽節三天  
下星軺四牡乘掄文清廟瑟相士玉壺冰江左竒  
爭拔湘南鑑愈澄風清嚴甲乙獎絕別淄澠準擬

趨綸閣旋歸愛稻塍分經司教育庶彥荷陶蒸著  
錄連吟篋濡毫疊剡藤闡疑開竅奧論藝剷榛芳  
作賦憐王粲驅車御李膺坵壇容側足篆刻賞微  
能愛士真無敵傾心我曷勝自從辭掖省翻覺戀  
菰菱綠酒親元亮秋尊憶季鷹諸生方問字四岳  
已交登行矣資霖雨良哉作股肱黑頭諸葛起纁  
帛濟南徵春色皇華裏燕臺山翠層鳴珂瞻朶殿  
晉秩近觚稜譽本雕龍擅謠應折鹿曾金閨羅碩  
輔絳帳憶傳燈雲樹長途隔鱗鴻尺素憑劔塵誰  
拂拭筆格失規繩異日承明地還期復擔簦

蘇臺懷古

荒臺悵望意無窮吳苑山川入畫中斷砌尚埋今  
古恨寒煙舊是綺羅叢鷓鴣飛後平蕪綠麋鹿遊  
時野殿空何似當年嘗膽客會稽棲得五千雄

旅次秋懷

牢落浮生拙因人愧壯遊吹篳來楚市磨鏡寄南  
州業自甘屠釣人呼作馬牛軟塵何逐逐行路亦  
悠悠未遂歸與興翻漆逝者愁座中誰識孟幕下  
且依劉地主逢仙令吳令黃君憐吾類楚囚一枝  
容信宿卒歲暫優遊遼海名全隱漳濱疾半瘳悲

歌空嘆惜跋扈捲岑牟意氣樽中盡年光隙影道  
 關山多落日星漢忽西流白袷涼歸篋黃花插滿  
 頭漫捐青玉玦漸敝墨貂裘鄉夢飛明鏡寒瓜憶  
 故山望雲徒悵快彈鋏尚勾留魯酒愁難醉商飈  
 慘未休羈懷雙別鶴旅迹一沙鷗齊物歸莊叟騷  
 情屬蹇修行當棹臂去恥作稻梁謀

送秦雨塘還會稽

相逢把臂話平生惆悵河梁空復情一曲驪駒吳  
 市酒半帆風雪越王城殊方慣易添離恨後會還  
 期憶舊盟此去鄉園何限好剡溪孤月鏡中明

平望

野水浮孤村寒煙斂斜照尚想耕閑翁結茅此吟

嘯宋末隱士孫銳字穎叔號耕閑居平望有集

鶯脰湖

一水分鶯脰揚舲任所如斷虹藏綠樹晚市賣銀  
 魚穉稔村村合籜筴个个疎此間堪結隱高枕即  
 吾廬

湖州道中

一棹空濛杳靄間坐看雲樹獨忘還白鹽赤米南  
 潯市流水桃花西塞山焙繭香生蠶舍火種菱人

語碧溪灣千家城郭行將近猶有遙岑露髻鬟

池上

草閣憑虛出風簾向曉開昨宵春雨過新水碧于苔

別內

一樽朝雨賦陽關執手相看慘別顏目送長隄人去遠小樓便是望夫山

同吳企晉鍾上亭徐俊三張韞輝登雞鳴

山眺後湖

落星岡畔縱登攀元武寒波莽蒼間朱邱遺墟空

寂寞水軍舊壘送潺湲秋風仍拂臺城柳返照疑

涵洛下山回首蔣陵龍氣滅葦條蘆葉滿汀灣

同作

長洲 吳泰來 企晉

香臺百尺倚崇岡嵐翠湖波極渺茫照眼雲山

非宛洛上頭棟宇自齊梁青林月暗聞雞埭碧

草春迷射雉場莫向昆明問殘劫華林魚鳥總

相忘

秋日村居

僻徑無車馬閑園長薜蘿潭空雲影薄樓迴樹聲多解帶貪高臥銜杯獨放歌草元吾已就寂寞意

如何

雜詩十首

春回土脈發百卉布青蔥彌岡被修陂鬱鬱不可窮  
奄忽歲云暮凜冽成嚴冬露白凋芳蘭江冷摧丹楓  
青蔥曾幾時已見攢柯空我聞龍門下亭亭百尺桐  
下枝巢鳳凰上枝吹天風秋風吹不萎春風吹不禁  
所以勵志士念此憂心忡  
夸父志逐日愚公思移山帝女銜石飛海水凌潺湲  
我思古之人寧畏心力孱招搖沒西北倏忽浮雲還  
轅馬鳴蕭蕭車輪駕班班問客何所之乃在五嶽端  
遙望危且險山獸相拘攀努力向前路誰復知我艱  
謂客無庸悲後至多所歡  
暮從野雀宿熱息惡木陰衆趨明所避抱影歸空林  
幽獨諒不愆要路胡足歆幸逢黍稷熟有酒且酌斟  
涼風日夕來理我止中琴四座請勿喧領此絃外音  
知音良獨難哲士多苦心  
枯桑號寒風駛景忽西匿故人在邯鄲妾身寄渭北  
信誓苟不渝川途安可隔所嗟蕙草殘芳華盡衰息  
衰息良可悲恥獨自雕飾水向溝中流縑自新人織  
新故一以移棄我如遺迹俯觀指潛淵仰

盼悲白日君行雖無期妾意終莫易不願化黃鵠  
願作澗中石

南國有佳人容華一何綺眇眇其愁予盈盈隔秋  
水秋水見底清下有一雙鯉我欲寄遠書搖尾不  
受餌中庭生桂樹團團秋月裏秋月照空階葉落  
秋風起

我有綠綺琴調高彈白雪盛以重錦囊繫之五綵  
結泠泠多清音入手詎敢褻鍾期舍我去輟絃遂  
長別別久再一彈淒淒聲慘切焦桐心未死向我  
發悲咽緬維古哲人聞此腸斷絕

西域有靈鳥自愛翠羽鮮虞人一見獲顛顛誰相  
憐不如轉丸蟲陋體堪自全梗梓千餘尺植彼南  
山巔匠氏斲爲瑟緼以朱絲絃不如河畔草離離  
自芊眠物理固如此人事亦復然斯言本莊叟不  
材終天年

匣中有利劍誓報知己讐袖之出門去結客在冀  
州贈我木難珠荅之狐白裘朝酣易水上夕宿咸  
陽樓趙女顏如花緩坐彈箜篌男兒重意氣此外  
知何求

洛陽少年子裘馬何翩躚身乘五花驄手控七寶

西莊如在稱  
鞭出郭射獵回擁至巨宅前洞房深且暖瓴水如  
插天妖姬倚門立迎笑工乞憐須臾歌舞集雜沓  
開紅筵淺酌醺淥酒緩歌白紵篇昨日訪其處陵  
谷多變遷一變爲荒隴再變成桑田憑弔悲風起  
拔劍心茫然

我昔登蓬萊俯視人寰卑囊攜五石散飯煮千年  
芝般般雪色鹿但向雲中騎陵陽及容成驂驪恣  
委蛇一朝忽謫墮紅塵暫栖羈世路多刺促蜷局  
靡所之何當揮手去散髮重遊嬉旦發自扶桑弭  
節凌崦嵫羣仙顧我笑共折珊瑚枝

揚州詠古二首

天塹俄驚劫火賒錦帆鳳舸到隋家閣中已老梁  
江總臺畔重逢張麗華魚爛空思香甲煎螢飛仍  
照玉鈎斜祇今板渚長隄柳雨葉風花故故遮

一夢江都作遠遊寒蕪何處認迷樓畫橋廿四金  
鞍躍殿腳三千翠黛羞南部煙花歸大業東流鳴  
咽送邗溝故宮并少銜泥燕重向空梁訴舊愁

泛舟出鎮淮門過小秦淮雨泊紅橋暮至

法海寺宿舟中三首  
晨光斂氛翳鼓柁出遠郊明漪下無底竹樹澄秋

西華女不私  
卷一  
二  
毫白沙媚綠篠雜卉含紫苞沿洄極斷漱虹影浮  
長橋青蘆響瑟瑟好雨來瀟瀟中庭陳樂方絃酒  
慰鬱陶回思在城市默慨形神勞  
鬱鬱汴河柳悠悠雷塘渚不見隋時宮荒墟盡平  
楚龍舟與鳳舳事往迷處所嗟我年運徂零落忍  
羈旅青陽不可留美人眇愁予不如隨所遭金樽  
引醪醕乘月弄清輝沿流采芳杜  
選勝興未極水石窮迢迢迴迴縱逸棹良遊遂忘  
歸豪家富池館反恨浦敘稀茲遊喜岑寂江湖共  
忘機移舟蘭若近落景含餘暉風泉動華燭水氣  
侵我衣卻因煙際宿驚起沙鳥飛

登平山堂

淮南江北海西頭最愛平山愜勝遊澗道泉飛開  
蜀井碧牕雲遠倚江樓我來乘醉還相過塔影松  
濤雜坐臥萬疊青山檻外迎二分明月樽前墮興  
闌懷古更踟躕宛轉層巒縱目餘雅集風流傳慶  
歷高名師友想歐蘇祇今廢興經幾度堂邊無復  
參天樹葉夢得避暑錄云環惟有隋隄廿四橋畫  
船簫鼓長來去

還家有作二首



倦遊垂橐返愁病復相兼長物青氈在高堂白髮  
添棄繻空有志種菜亦何嫌回首天涯路行藏不  
用占

牽蘿重補屋息影謝風塵魚鳥閑中樂桑麻野外  
新卷書還對酒倚棹或垂綸終勝長安內棲棲索  
米人

折楊柳

酌酒口唱楊柳曲出門手折楊柳條愁霖滿地泥  
滑滑行人上隴車遙遙

艾如張

艾而張羅張羅野田裏野田雀飛多誰家蕩子更  
用蘇合彈嗟爾安得飛上天拔劍救爾出拉沓高  
飛離哉翻不願受爾雙玉環玉環不願受乃是俠  
少年

木蘭亦鳥生八九子

烏烏啞啞尾畢逋不知壽命真為愚攜子八九銜  
一妻道逢鷓子經天飛鷓子啄烏洞左腋生子失  
母良可惜君不見黃鵠多從大澤遊鳳凰遙宿層  
城阿鷓子雖猛當奈何

江灣舟宿

西鼎女存和  
霜天不覺暝遠岸繫輕舟夜月孤鴻影蘆花海色  
秋燈殘搔短鬢酒盡攬征裘欲問蘄王迹寒潮咽  
暮流

題廷諤畫

披圖長自愛煙嵐筍笠筠竿我舊諳風葉滿江秋  
水濶孤篷殘夢到江南

遊天平山晚宿德雲菴三首

霽曉綠松陰幽尋不辭遠羣峰插天來蒼翠忽在  
眼深谷轉逶迤千盤陟蹇產下嶺路忽平佳境欣  
屢變朝嵐四回合層崖昧陰顯中涵數頃池淥淨  
纓可澣面面青蓮花倒影一鏡淺藻密舞淪漪魚  
樂恣游衍旁有緇經臺人去空碧蘚獨立聊逍遙  
風來泠然善

久落塵網中見山喜莫當捫葛尋仄磴披雲來上  
方半山敞閑亭豁達天宇涼似聞風中泉觸石鳴  
鏘鏘仰瞻匹練挂飛沫千巖旁時于白雲裏流出  
松花香結構倚絕壁高下連虛廊窈窕極迴轉一  
徑穿雲岡石林鬱相錯翠柏紛成行不見來處路  
俯視煙蒼蒼  
微月生嶺下我亦尋歸途歸途澹容與涼露衣裳

西莊女存稿  
卷一  
濡夕霏散作雲一氣乍有無遙瞻德雲菴煙外開  
精廬佛光照閑寂妙香浮空虛齋厨供脫粟一飽  
已有餘宴坐默不語塵根淨捐除夜深聞見滅清  
夢忘遽遽晨光林際動整駕命僕夫回首翠微頂  
戀戀重踟躕

春日舟行

亂水春煙外沿洄背郭斜連村香煮筍近市戶撈  
鰕野岸桃花浪茅檐燕子家何時脫塵網結屋老  
蒹葭

夜歸

犬吠竹籬外燈明草屋中寒潮隨月上孤櫂隔溪  
通稚子候門久家人酌酒同夜闌如夢寐相對慰  
飄蓬

村暮

暝色起山徑柴門人悄然疎鐘烟外寺遠火渡頭  
船倚杖數歸鳥行歌聽晚蟬欣逢鄰叟至欸欸語  
豐年

漫感

火鼠火不避冰蠶冰不傷蓼蟲食苦辛寒號笑鳳  
凰萬族各自得本性固有常有錢始作人志士多

西苑女不和 卷一 五  
慨慷棲棲求僭石飄飄托殊方摧折氣已下羞語  
百鍊剛寄愁天路遙仰視空傍徨

溪行

響  
扁舟煙際開孤月林中上蒲稗不因風蕭蕭自成

馬鞍山弔宋劉過墓

斷碣空悲蔓草纏高人埋骨此山前六陵蕭瑟冬  
青樹朱烏魂歸更可憐

蘓草浜

一艇隨潮閣淺浜水蒲風絮夕陽晴踏車纔過秧

田滿楊柳陰中穀犬聲

抵舍自慰二首

淚痕客久滿衣裾塵網何時得破除蹤跡原無千  
里外飄零已是十年餘薄田未定躬耕計殘蠹空  
留手校書燈火團團堪慰藉從今準擬狎樵漁  
茅屋三間帶石泉孺人稚子共留連藥罏經卷閑  
相慶椎髻蓬頭盡可憐磨滅懷中半刺字商量生  
計五湖船笑他犢鼻貧無賴且拔金釵當酒錢

吳閶舟次贈婦

茂苑城如畫扁舟蕩晚暉折花簪寶髻弄水濕羅

西莊如存和  
衣寒入春陰重山連遠翠飛前溪今夜月攜手欲  
忘歸

題去瑕兄詩卷二首

西風生微涼孤館秋蟲響客子恒畏人閉戶絕還  
往吾兄靜者流相於比肸蠻長嘯落蘇門孤行披  
鶴氅同姓情所敦論藝迭歎獎倒囊出新詩清絕  
逼泱泱泠泠冰雪音臥對肌髮爽我已鍊大藥神  
山勞夢想相攜歌紫芝飛步謝塵鞅  
我家練祁湖卜居始吾祖君家婁江濱帶索守環  
堵耦耕願未償因人嗟終窶短衣浣埃塵席帽衝

風雨吳閭佳麗地信美非吾土鬢影各蕭然相顧  
愁千縷勸君學干時要路當自取不然覓錢刀去  
作洛陽賈低頭耽苦吟戚戚終何補

題秦淮水榭

花月春江枉斷腸紅樓十四卸紅妝輕煙淡粉低  
迷處舊事空傳薛潤娘

春申君墓

纍纍荒土古苔生尚憶當年結客名珠履三千皆  
上坐悔教國士失朱英

登君山

浮遠堂前路蒼茫草樹清懸崖千石瘦倒影半江  
明鳥入孤雲滅天連暮色平鄉關何處是凝望不  
勝情

青暘

一碧溪流駛人家雲水隈船頭衝暮靄秦望數峰  
來

渡太湖

渺渺上孤舟蒼煙白露浮寒潮明月夜落木洞庭  
秋有酒謀長醉無衣動客愁頻年走吳市刺促愧  
沙鷗

垂虹橋夜泊

倚櫂垂虹畔蒼蒼夜氣分漁燈連雨暗戍鼓趁潮  
聞地迴滄波外煙浮笠澤濱江湖佳興在清夢雜  
鷗羣

桐汭道中

策策寒飈問客程亂峰千疊暮煙平孤城卻似村  
墟僻細徑時聞麋鹿行霜野稻收空水石人家樹  
杪露柴荆堪欣此地民風古曾向春秋識舊名

楚子

西子期伐  
吳至桐汭

憶內

西莊如在和 卷一  
空階涼雨暗窓風燭跋香銷最惱公偕隱方成共  
命鳥離居偏作可憐蟲年華荏苒看明鏡書劒飄  
飄逐斷蓬紙閣蘆簾歸計好沉吟舊約去匆匆

宿家琴德齋中賦贈

一夕西窓剪燭時漫嗟相見十年遲青芻白飯能  
留客細雨檐花好賦詩獨抱遺經惟汝在別裁僞  
體有誰知他年攜手名山去上下雲龍免別離

過薛澱湖

衆澤東南匯蒼然煙樹重彎環二百里平浸兩三  
峰客枕嚴更斷輕帆曉霧衝乍移楊柳岸坐愛水

雲濃極望飛空翠深山忽暮鐘屢屨青壁峭蘭若

古苔封蕙帳祠秦女靈泉閱毒龍半天樓隱隱四

面浪淙淙

澱山在湖濱上有普光王寺  
秦女祠又有龍洞下通太湖

此際牽行

役何時策瘦筇勞生淹旅夢活計羨吳儂別浦漁

莊合疎籬雜卉濃秧田泥滑滑芸鼓晝蓁蓁桑落

浮村社松明照夜舂叉魚先置簞編椴或黏葑苓

箸攜橫港符簷覆短舸農談真瑣碎野趣便疎慵

地本鄰三泖潮來接五茸綠蓑如可著判向釣船

縫

泖湖竹枝詞四首

葦花菱葉接蒼茫  
谷泖橋邊上野航  
斜日一篙瓜  
蔓水輕帆齊落秀州塘

由拳城西水拍天  
近橋長泖近山圓  
聞說女牆湖

底現那教滄海不桑田  
近山涇泖益圓曰圓泖近泖橋泖益濶曰大泖自泖

橋而上縈繞百餘里曰長泖由拳故城没于泖中每風息雲開衢甃井闌畢現見顧清松江府志

渺渺陳湖開鏡奩  
練塘孤嶼滿蒼蒹  
儂船恰趁晚

潮去望見亭亭一塔尖

傍湖蟹舍共漁汀  
過雨波光似畫屏  
浦口女兒眉

樣好彎環巧學九峰青

同邵楠亭蔡樸夫朱因在集高自柏泖上

村居

傍湖雲樹含暝煙  
籬外纜我西溪船  
故人握手樂

復樂滿座清談元  
又元杯行自怯酒  
戶小夜永徐

看燈花然判留信  
宿未可去檐前雨  
急春風顛

西莊始存稿卷一



西莊始存稿卷二

古今詩 非別集

淞江水留別顧培穎錢曉徵二秀才

淞江水一灣活碧浮清泚數家雞犬繞孤村幾處  
魚蝦成小市顧生結屋江上樂地偏錢生於此襍  
被吟眺長周旋開門十頃薑蔗田笆籬竹樹皆便  
娟斜陽斷處明疎煙我來繩牀三日臥談元樂飲  
得自便我有兩妹事兩生豈伊異人我弟兄度阡  
越陌良快意明朝岐路難為情薊門道遠堪惆悵  
眯眼黃塵作還往何不結鄰此地老江鄉青鞋布

西華女不稱 卷二  
鞞同徜徉長安詎易居西笑不自量試看淞江潮  
兩迴別意與江誰短長

送王鳳喈孝廉入京二十二韻

嘉定 錢大昕 曉徵

緱嶺源流遠烏衣甲第聯經筵貽祖訓海岱誦  
遺編膝下依懷祖樓頭賦仲宣五車緡鄴架十  
樣擘蠻箋吳苑追吟社隋隄泛酒船詩名何水  
部樂府柳屯田聲望高江表飛揚恰妙年搏風  
鵬翼便揆藻鳳毛騫底用琴同碎從看蝨自穿  
南金宜入選北闕正求賢令節銀燈閃長途征

旆懸梅舒纜吐萼衫薄乍裝綿柳外青絲騎花  
前白玉鞭勞勞頻敬罔去去更留連數載葭莩  
舊相於膠漆堅藏鈞朝共賭剪燭夜忘眠阮籍  
恒垂睠洪崖記拍肩牛心爲我割雌伏竟誰憐  
知己今分袂高歌且撫絃陽關聲第四燕市路  
三千努力茲行矣銷魂倍黯然短亭凝竚久別  
思滿前川

伍牧弔宋將尹玉戰死處

水市山橋帶夕陽鬼雄殘夜泣昏黃土花暈碧尋  
遺鏃識是當時舊戰場

渡江

形勝江山在青蒼吳楚連斷霞京口樹殘雨廣陵  
煙壯志風乘浪鄉心醉扣舷此來凡幾度彈指數  
流年自戊午至今  
六次渡江矣

淮陰侯釣臺

蕭條泗水入淮處高臺傾後餘平楚為憶昌亭寄  
食時王孫一飯意良苦已致千金報母恩弓藏鐘  
室劇悲辛興劉蹙項渾閑事只合終為把釣人

渡河

九曲洪流暖漲開披襟問渡思悠哉漢家沉璧宣  
房築元使窮源星海迴浩蕩天風浮仄岸喧逐地  
軸走轟雷大伾禹力千年在何事奔騰南向來

下邳懷古

荒郊憑弔意踟躕畫角孤城晚照餘卻笑秦坑燒  
未盡圯橋猶剩一編書

望嶧山同陸聽三作

龜息相接一峰竒曉色偏從煙靄宜漫說孤桐傳  
禹貢早看野火失秦碑雲開偃蹇抽蓮萼天遠連  
蜷隱黛眉跋馬斜陽重回首幾時策杖躡屣屨

兗州早發同沈松友作

...

渺渺昏鴉散高城豁遠眸南池看洗馬東郡罷登樓  
殘月千山曙寒煙一抹浮客心如汶水蕩漾逐春流

夢遊岱嶽歌

我志窮十嶽身佩真形圖汶陽道上縱遠目突兀  
岱頂青模糊魯酒若琥珀絲繩提玉壺解鞍即醉  
倒偃臥胡姬壚天風飄飄浮絕磴導我忽轉松蘿  
徑蘿徑逼高寒蒼蒼十八盤漢策闕古字秦松瀉  
哀湍振衣便覺凌紫極倚劒直欲生飛翰穹崖濺  
瀑多殊狀決昔已在層霄上碧霞四氣拱星辰青  
帝五雲開嶢嶢嶢嶢疊疊煙青青封中雲氣縷縷  
生安期一笑相逢迎如瓜之棗出啗我驂駕白鹿  
空中行天門誅蕩日觀龍從河流挂樹海色搖空  
蒼煙九點望不極合沓下見扶桑紅銀臺倒影火  
輪出驚回清夢仍相失風馬雲車乍有無丹梯翠  
壁看明滅應劭記李斯碑平生懷抱空好竒餐霞  
鍊藥不早就坐待蓬萊清淺始悔朱顏衰風塵回  
首驅征鐸惟聽霜鐘殷巖壑萬里終當汗漫遊十  
年肯負煙霞約

東平曉發

遠村荒雞號枕上失鄉夢披衣燈燄細屋角霜氣  
重僕夫提煖湯相喚解寒凍出門山四圍孤城補  
其空十里棗樹林朝曦散霧松居民賣雪梨羌兒  
傾馬漣喧喧趁墟人小市笑一闕堯祠已陳跡蒼  
鼠竄茅棟尚想五太守古調足吟諷渦泊連洄源  
野碧涵芟葑征途雖云勞佳處聊目送

曉發東阿山行作

曉星大如月照見衣上露須臾衆峰出行行莽回  
互梁山勢峭崿仄徑渺難度碎石大如斗縱橫亂  
無數歷鹿簸雙輪砰擊吁可怖驚飈捲地來撲面  
不得語淅淅雲氣白荒荒日色暮人馬同時飢流  
汗劇窘步明發遵坦途搖鞭出山去

村夜

土銼無煙野店孤空林缺月挂模糊寒燈欹枕嚴  
更斷一夜霜風白草枯

小市黃河間旅店同錢孝廉林一賦

風鐸郎當易夕陽又看倦旅卸輕裝酒壚繫馬錢  
教數茅屋張燈鈎共藏野入天雄山齧齧雲連涿  
鹿樹蒼蒼祇憐雅樂今寥落誰指遺墟話故王

對持燕雄縣

控引燕南地勢尊水連瀛鄭暝煙昏瓦橋關險河  
流繞亞谷城荒戍馬屯朔氣吹沙迷客路冰漸塞  
岸減濤痕宋遼指點尋盟處鎖鑰當年重北門

小市

小市黃茅店孤村白板橋停驂成一宿客思最無  
聊易酒偏難醉燕歌漫獨謠故園梅蕊發歸夢入  
今宵

白溝河

一水中分南北流白溝此地即鴻溝時清戰壘今  
消歇黑子區區十六州

涿州道中

孤城莽蒼入斜陽平野黃雲古戰場燕薊河山雄  
督亢英雄事業想樓桑遠嵐疊翠圍如幄亂水穿  
沙沸似湯憑弔更添羈客思十年岐路足悲涼

董子祠

古木蒼煙董相祠偶來剔藓讀殘碑天人策對才  
無敵災異書成身更危誰酌清泉羞杞菊漫多塵  
網罟呆愚最憐希世工談笑輸與平津牧豕兒

蘆溝橋

臥虹終古枕桑乾泱泱渾河走急湍馬邑風煙通

西華女不和 卷二 六  
一綫太行紫翠壓千盤喚人喔喔荒雞早照影蒼  
蒼曉色寒沙際閑鷗應笑我又聽鈴鐸送征鞍

聖人出

聖人出臨萬方以聖紹聖垂衣裳煌煌庭燎開建  
章嘈嘈仙籟陳笙簧璇扃掩靄排天閭玉瑱雕楹  
金飾璫五色焞爚爛齊光昭仁春溫抗義秋霜紫  
煙裊空艾蒟香六虬奕奕來常羊千騎萬騎紛成  
行禮神神降歆蘭觴東方青圭南方赤璋西方白  
琥北方元璜遂遣問民疾苦毋出今年租賦閭澤  
汪濊咸悅康雲旗還佇翱翔十二龍偃蹇驤黃支

烏弋遙來王句臚冠劔鏗鏘援琴鳴絃奏薰風  
一彈再鼓儀鳳凰節節足足秋秋踰踰安歌雅舞  
諧宮商陛下萬壽垂無疆披圖案牒超虞唐

永光寺

萬壽前朝寺開山記辨公青松畫障失綠漲古潭  
空幽砌飛鼯鼠踈花綴水荇避喧時獨往便擬脫  
樊籠

過晉陽菴徐省若寓

微微仙梵出精藍樹影浮空割嫩嵐卓帽故人吟  
思苦一燈古佛正同龕

魯連村

玉貌城中客流風感至今射書憑一箭排難卻千  
金落日嘶征騎寒煙動遠林平生蹈海意祇益鬢  
毛侵

徂徠懷古

秀絕徂徠色遙憐洞壑幽竹溪傳六逸詩卷自千  
秋未得從高蹈空勞賦遠遊茫茫磔石谷臨眺迴  
含愁

任城李太白酒樓歌

任城酒樓高人雲游絲飛絮何紛紛竹溪六逸今

安往斷碣蒼苔蔽榛莽汶水東流去不迴徂徠秀  
色空森爽紅泥亭子赤闌干當年豪飲來盤桓沉  
香牡丹看不足騎鯨徑去埋青山我向東門遊登  
樓縱高宴魯酒白玉壺不用金龜換醉眠衣上斑  
斑紅幾點春風落花片我無謫仙百首詩興酣一  
斗頗似之鸕鷀之杯葡萄醖何當喚起同醉樓頭  
月  
道上詠官柳  
柔絲一路舞纖纖塞北江南綠未芟低覆濃陰停  
客騎亂飄殘絮撲征衫幾番朝雨烘晴翠到處春



波送遠帆卻恐重來搖落盡天涯回首夕陽銜

歸途漫成

輾轉旃車往復還半年塵土澣衣斑漫傳司馬宜  
乘駟自識梁鴻早出關學道應須歸慧業著書端  
舍讓名山五湖煙水耕漁伴正好相逢一破顏

有贈

京雒緇塵徑拂衣荻簾土銼掩荆扉得官爭似卿  
偕隱新娶何如客乍歸茶覆閑徵清照事幃開橫  
解小郎圍茂陵四壁人消渴只借眉山與療饑

贈虞丈東臯集杜句

廣文到官舍吳門興杳然釣竿欲拂珊瑚樹鮭菜  
忘歸范蠡船吏隱適情性陶冶賴詩篇羣書萬卷  
常暗誦清詩句句盡堪傳近來海內爲長句紛紛  
輕薄何須數似君須向古人求世人那得知其故  
學書初學衛夫人書貴瘦硬方通神蛟龍盤拏肉  
屈強鷲鳥舉翮連層雲丹青不知老將至尤工遠  
勢古莫比挂君高堂之素壁雲白山青萬餘里天  
下幾人畫古松意匠慘淡經營中陰崖卻承霜雪  
幹中有雲氣隨飛龍多才依舊能潦倒但話宿昔  
傷懷抱王生早曾拜顏色相逢苦覺人情好悠悠

滄海情旅食豈才名平生感意氣歛使寸心傾先  
 生有道出羲皇焉得置之貢玉堂一官羈絆實藏  
 身茂陵著書消渴長青山落日江湖白神仙中人  
 不易得一為歌行歌主客

西莊始存稿卷二

西莊始存稿卷三

古今詩藏山集

東洞庭山後舊有朱氏築畫樓教家姬歌  
 舞見吳梅村詩今已屬他姓易名縹緲秋

日來遊率題二首

蓬島方壺空翠間金鋪石室鬪煙鬟不須更探靈  
 威洞倚檻平吞萬疊山

嵐影湖光照綺疏飄零紅粉百年餘孀居燕子人

誰在剩有朱欄浸碧虛草荒青山容是限回首笑

歸自太湖東山舟中作

橋社辭幽徑查灣上野航綠楊低雨色白鳥破湖  
光楚客衣裳冷吳宮花草荒青山容易別回首笑  
人忙

渡黃浦

古渡春申鑿寒潮滬瀆趨樹黏天勢濶帆掠浪花  
麓近海魚龍怒先秋雁鷺徂十年鄉國淚辛苦滯  
江湖

偶成

本作采芝客甘同刺草臣露車聊遁跡牛僧亦容  
身漫說貧非病從知嬾是真鄰翁荷耜至歡笑轉

須親

城南訪張擔伯

問訊城南路幽人在澗阿著書仰屋好頌酒閉關  
多寂寞茂陵臥蒼茫小海歌論文一傾倒風雨數  
來過

采菱曲

宋鮑照齊王融陶功曹均有采菱歌辭意舛陋  
梁武帝改西曲作江南弄七曲有采菱曲簡文  
帝及江淹徐勉陸罩江洪費昶繼作其辭亦未  
工也予息影五湖湖上人家大半種菱因用昶

首句以發其端而增衍成篇不特以潤色古辭亦聊以操土風云爾

妾家五湖口采菱五湖側自言生小慣風波越女紅妝舊相識相識恰相逢蕩舟明鏡中木蘭爲櫂青絲紉桂浦椒潭極望通極望重重煙樹合菱花菱葉何稠疊淥浪開時搴紫莖白蘋香處搖輕楫停楫憩江潭遙山斂夕嵐清歌來渚北雜弄和江南江南此際堪腸斷玉殿涼風歇絃管千金翠羽空相向一片春芳盡衰晚衰晚漫多愁相邀返渡頭羅衣已覺薄白露暗驚秋秋江日暮寒潮湧菱舟女伴誰相送橫塘獨打兩槳歸惟見鱗鱗水雲動

飲馬長城窟

結髮從軍去沙場萬里行玉鞭何用指馬自識長城

嬌女詞曲

日高睡起遲阿母爲挽髻作女倚母憐作婦難倚婿

踏青詞

南陌踏青去妝成日未晡褰簾臨上轎嬌步索人

扶

燒香詞

法鼓鳴金界靈旗裊蕙帷手拈香一炷跪拜學男

兒

小長干曲

送歡小長干江帆疾於駛儂道是風波歡道是平

地

上津曲

蘇州閶門外有上津橋下津橋

上津多估客下津多倡家喚取銀箏彈一曲楊柳

花

山遊述志

習靜歸巖阿身世永相棄眷言陶嘉辰棲尋信遐

寄萸英綠野秀蘭芳紫莖媚綠源極演漾曠渚渺

空翠水上風行徐山下出泉細屯雲正滿眼孤煙

杳無際層崖隱天維登頓歷蒙翳出窈入冥間忽

復造幽異峭菴松磴陰滴瀝乳竇秘境往情已遷

言忘理成契養真誰為同齊物自無累傾暉不戀

人晚晚映衣袂逝將遊太元逍遙辨深意

閑居偶詠

真樂在自得物疎性乃廓高齋坐閒寥畢景任淹

薄歸雲宿閑牖芳塵暗高閣偶披古人書欲繼斐  
然作煙蘿垂清陰籤帙映參錯探竒難強名味道  
更何忤餘暇肆窺臨遊目睇巖壑寒泉瀉盤石華  
月麗曾岵蘭英自翩翩桂枝漸蕭索逝者如斯夫  
撫化識冥漠白賁如可希肥遯庶堪托

贈翁朗夫

蹠蹠詞壇舊有聲靈舒健筆自縱橫盧鴻十志耽  
肥遯陶峴三舟愜野情白雪高吟應少和青山穩  
臥爲逃名五湖此際堪乘興喜奉春風杖履輕  
同沈歸愚先生汪自牧顧陶元沈蘭初吳

在揚郭曉升曹菽衣李健林吉乃振程自  
山張誠伯蔣遇純家學舒諸子集蔣子宣  
塔影園二首

悠然水石徑開三叢桂香中此盍簪一老風騷推  
鉅手羣公蘊藉足清談醉餘豪氣看長劔簾捲高  
秋落翠嵐珍重他年車笠約相逢賓主盡東南  
江關蕭瑟竟何如風雨招邀慰索居自昔酒人多  
意氣論交名士半樵漁洞庭落木清霜候吳苑疎  
砧白露初後夜河橋吟望遠舍情好爲問雙魚

泛太湖泊東山麓

擊汰中流去空濛指洞庭曉鋪千匹練冷浸一天  
星水氣侵衣濕嵐光倒影青莫釐欣在眼棧棹入  
巖扃

題學成上人山房

黃雪高枝綻金庭古洞幽山空疑欲雨人瘦不禁  
秋嗜酒陶元亮能詩湯惠休長歌自來往七十二  
峰頭

登縹緲峰望太湖

吳山多平衍此地偏嶄崑天公妙手斡地肺結作  
洞壑連空嵌晴峰四面七十二青天亂削芙蓉巖  
未若縹緲尤冠絕兒孫羅立誰能參我生本無適  
俗韻溪雲林靄性所耽竭來况逢春霽色支筇挈  
伴尋煙嵐艇子呼短棹茶具攜都籃行行腰腳雖  
已憊欲窮遠目心翻貪振衣千仞逸興發極望寒  
鏡開塵函重重出浦樹渺渺來風帆琉璃作堆濕  
銀破雲濤倒黏天蔚藍空濛幾點螺子髻斜插玉  
女青瑤簪有山如此良不惡自昔冷客齊來探或  
結蓮花社或居燕子龕何當一日婚嫁畢香茅老  
屋峰腰添拏舟便剥菱角紫入饌細嚼蓴絲甘一  
寸二寸花開菖蒲節千个萬个竹放檀欒尖龍威

古洞况有書可讀珠墳笙典一一同研覃回首碌  
碌塵容黔世味雖好不復諳卻憐興盡惆悵去買  
山至竟成虛談

題沈冠雲登岱圖

岱嶽峻嶒最上頭羨君振策倚高秋中峰長嘯星  
辰近大海回瞻天地浮紫翠千重迷漢碣蒼茫九  
點隘齊州茂陵歸臥頽然老一簡金泥迴自愁

即目

煙裏櫂歌聲沙禽靜不驚斜陽雨外斷空碧數峰

明

范上舍塞北省親圖

一人紫綺青羔裘雕鞍側坐玉躡騶導以僂從連  
輕輶一人袴褶捲臂鞬蓬頭突鬢佩吳鉤停驂左  
顧欲進仍遲留主人戴笠披赤罽意氣凌厲凝雙  
眸問誰粉墨開金碧咫尺煙嵐浮几席軍中一范  
方專城公子思親事于役何甥謝舅亦肯從徑自  
江南趨塞北初出居庸關黃羊白草蒼厓間再度  
彈琴峽霜林岔道風蕭颯土木宣府都經過柳屯  
枳嶺征塵多回瞻來處莽無際漸覺所歷高嵯峨  
羊腸一綫穿雲去亂石驚湍灑寒雨疊嶂摩天落



西莊詩存卷三  
日低崩榛匝地荒煙暮鳴鞭遙見飛狐口代郡孤  
城隱雲樹烽樓危旌凍欲折指點先朝備邊處六  
郡防秋有戰場三關設險空殘戍解裝一笑循南  
陔綵衣舞罷欣徘徊遠慰頻年望雲志壯遊還上  
李陵臺郊原泱泱平沙走埃火關榆重回首龍堆  
定有控弦兒雁磧應思射雕手嗚呼男兒出門萬  
里輕樂事况復當趨庭功名會見繼老子自有胸  
中十萬兵

題徐昭法畫

畫樹樹多不了枝畫石石亦不著色淡染寒江十

里秋落葉歸雲渺何極先生高節超塵寰胸中粉  
本無荆關展卷舊遊差彷彿扁舟煙月道場山

題姜學在江山初霽圖二首

咫尺煙濤泱泱浮村霏汀樹入新秋歸帆曾記江  
干落倚遍金焦寺寺樓  
滄海桑田望渺漫西臺如意所翁蘭憑將一掬遺  
民淚留向雲山畫裏看

八月十五日夜雨宿毘陵僧舍

哀柝聲聲斷吠厖客中野寺冷殘缸無端一夜中  
秋雨偏趁西風到破牕

還家述感

時長妹貞  
嫖病卒

棲遲長貨畚慟哭更迴車骨肉死生裏田園蕪廢  
餘草生仲蔚宅塵滿子雲居寂寞誰相問虞卿且  
著書

病中作

窮秋搖落渺愁余伏枕經旬滯索居短褐風霜欺  
病骨空齋藥裏伴殘書影孤亂葉寒蟲裏夢斷昏  
燈落月初欲學龐公盡室去茂陵消渴竟何如

鄧尉看梅二首

空翠滿林巒扁舟索笑看香魂疑有夢瘦影不知  
寒竹外橫斜照煙中傍素湍莫教羌笛怨吹徹數  
枝殘

谷口通樵徑層巖躡屐來東風能澹蕩野興獨徘徊  
地喜青山繞花憐白雪開長吟霜月上臨去首  
重迴

同作二首

嘉定  
曹仁虎來殷

谷口探芳去溟濛雨後天寒煙雙崦樹暮色五  
湖船素影侵樵徑幽香帶石泉籃輿更回首杳  
杳數峰連

鄧侯棲隱地碧嶂自煙霞古寺留春信空山識

西華夕陽千樹暝殘雪一枝斜何處歌聲起行  
行問酒家

三十三峰草堂圖歌爲暨陽翁朗夫徵士  
賦

暨陽城邊勝概兼連峰疊巘三十三先生草堂出  
山頂森森衆壑浮蒼嵐杉風松日各清美飛泉決  
決石齒齒亂葉酣霜鬪霞綺雲根有徑細不分幽  
探忽落芒屨底茯苓采罷不復還自騎白鹿青崖  
間春申冷魄何足喚惟有長江浩浩坐見萬里之  
波瀾山中桂樹成叢日篋裏新書著初畢蒲輪忽

漫來巖扃六聘三詔猶難出  
聖人宣室方求賢未許先生臥蓬華棹頭仍復來  
江潯攀林躡閣窮追尋臯橋綠水春正深相逢意  
氣相剪拂愛才宛見先生心酒酣示我草堂圖但  
覺霏藍翕黛一片雲氣吹陰陰爲言五嶽有前約  
肯拋猿鶴負向禽吁嗟我生墮塵網遙憐福地多  
蕭爽儻許茅齋割一峰徑欲相從作長往  
贈筆編顧祿百過不值  
一徑風雨夕殘紅屐齒香虛煩故人駕出飲久空

牀

續文獻通考

贈楊文叔太史

談經伉伉斗杓迴湖海者英解愛才獻賦早簪東  
 觀筆辭榮重剪杜山萊通門孔李懷先澤往事龍  
 蛇話劫灰先伯祖偉長先生與太鄉薦擬學侯芭勤載  
 酒高文史祖維斗先生同鄉一校讐來

贈許子遜二首

大雅扶輪手清時通德門懶多吟屐健隱去告身  
 存自顧羈棲慣欣逢笑語温從茲頻載酒風雨得

同論

正始今將絕平生亦足豪賞音惟沈范作意有風

騷清廟朱絃貴陽春白雪高試看獨到處肯與俗

人操

落景

落景柴門內閑來眺望賒村煙炊折葦溪鳥啄殘  
 花植援宜編枳疏泉好種瓜何須歎岑寂美酒是  
 生涯

五畝

五畝未全荒周遮薜荔牆更無軒騎到時覺芟荷  
 香妻訝吟成癖人憎醒亦狂祇愁青鬢改歲月去

堂堂

西莊即事二首

一曲婁江水延緣岸岸通扁舟纜繫纜宿麥正翻  
風樹色孤村外人家暮靄中老農如舊識春社幸  
能同

杜老東屯宅陶公下溟田不須論出處聊喜得幽  
偏發興捨書賣移家帶鶴遷躬耕真有願臥穩向

江天

訓韓處士其武

少文耽臥遊圖畫皆名山仲若開林澗結構同自  
然夫君敦雅尚隱淪洽所安蓬蒿滿三徑還得靜

者便翰墨時問作毫素中誠宣清機吐元理沖襟  
挹高言投分托苔岑相與樂盤桓曲宴洗尊尊列  
坐羅長筵顧慚薄劣姿謬倚盤石堅傾心枉光塵  
贈以清風篇清風永披拂出入懷袖間願言結綢  
繆莫報金琅玕何當采靈藥共期青雲端

秋蘭二首

衆卉飄零後芳叢擅素秋漫言風露冷不礙色香  
幽小院數莖澹閑階片影留擷來堪作佩楚客起  
離愁

冉冉涼飈動離離曉霧團國香寧畏晚空谷不知

寒杜若芳洲落靡蕪曲徑殘涉江遲暮意珍重後  
時看

金閨旅舍秋夜不寐  
寐來甚於夙昔容狀  
布衾如鐵一燈青拉瑟西風吹滿庭砌冷草根蛩  
寂寂池荒荷葉雨冥冥更長夢短應難續酒少愁  
多卻易醒搔首思量十年事羈孤踪跡自浮萍

憶內

謝家辛苦嫁黔婁數載心期矢白頭伴讀寒閨看  
理繡鬪茶小舫話悲秋艱難兒女催君老萍梗飄  
零共我愁早晚青山歸去好挽車舉白願應酬

登靈巖

躡屐層崖迴自哀館娃遺跡俯崔嵬梧宮秋老悲  
青嶂香徑春空長碧苔石磴盤迴飛鳥上湖光隱  
現亂峰來千年歌舞歸禪窟目斷荒煙落葉堆

琴臺

偶坐盤石上因彈五絃琴山空琴聲歇纖月升疎  
林

響屧廊

空巖引修廊苔痕雨初長浙浙吹松風時作環珮

響

西齋詩集 卷三  
吳王井

一泓貯孤岑雙桐鑑空影千古傳吳王何如景陽

井

涵空閣

危闌倚天際列岫當牕中夜來霜林靜仙梵流寒

空

琴臺

舟中眺湖上諸山

秋氣動林巒虛舟信迴轉帆隨樵風移心逐空水  
遠沙禽相叫嘯渚蘋冒清淺連峰非一狀合沓迷  
幽顯孤雲宿深鳴寒鐘遞遙巘夕陽霞際明微徑  
煙中辨津逮有宿期入林願未展地偏宜嘉遯道  
亨無往蹇竊慕仁者樂獨異衆人撰明發循山阿  
茲言庶能踐

舟次呈歸愚先生

謝公屐齒坐相邀陶令藍輿興自超細雨帆開光  
福市夕陽人語虎山橋金庭玉柱前期在翠閣丹  
梯入望遙聞說探竒更東去雲中徑度赤城標

生將遊天台

東崦西崦

溪行忽無路回首暮煙合過橋湖水寬隔岸亂雲

接圍繞玉鏡潭寒影衆峰集空色不可攬彩翠似  
堪拾東西崦幾重蕩漾舟一葉迢迢擅勝亭隱隱  
光福塔何處聞菱歌清唱自相答

入鄧尉山暮宿聖恩寺中野叟志林

蒼煙滿秋山落日生暮靄弭棹歷嶇欽理策尋靈  
霽溪橋風泠泠寒流激空籟捫蘿長林迷跼步崖  
石礙微月墮幽澗俯見清光碎寺開知徑盡客至  
自雲外空堂響法鼓羣動息香界慮澹不用遣深  
夜無夢寐欲謝區中緣攝生遠塵壒

還元閣月夜望震澤

依山復面湖閣勢得全勝高倚獅子窟遠挹熨斗  
柄羣壑斂暝色入夜猿鳥靜華月海底出清光蕩  
靈境三州此交匯萬頃互涵映漁洋煙鬟明法華  
螺髻靚參差飄素練遠近點明鏡極視窮虛無一  
氣自迴亘何當刺船去滄浪發高詠

閻望雲際曉登元墓最高頂

日出谷鳥吟策杖前山去煙際尋鐘聲迢迢翠微  
露懸崖極躋攀吳越歸指顧千仞振衣危二分垂  
外懼昔賢此遺蛻嘉名兆元墓浮嵐忽明滅靈區  
遠迷誤秋色來何峰蒼蒼滿雲樹烏下洞庭波衣



西莊始存稿  
卷三  
邊林屋雨未逢青泥飯  
聊詠白石句平生正壑心  
纓紱徒塵慮

題壁

長松萬壑捲天風  
一路寒流古木中  
卻上毘盧高閣望  
雲濤煙雨蕩空濛

自歐鄧尉山下別僧

孤雲夕鳥歸薄雪寒林凍  
回首雨花橋山僧此相送

漫興

一碧清溪曲繞廬  
依然小隱賦閑居  
菱絲風裏看收稻  
柿葉林中坐展書  
萊氏逸妻能負畚  
左家嬌女慣牽裾  
君平未必人皆棄  
自愛煙波學釣魚

西莊始存稿卷三

西莊始存稿卷四

古今詩涉江集

十二月二十六日辭家

歲暮遊子歸我反離庭闈上堂別二親肅拜還整  
 衣弱妻抱穉女相送臨門扉無語語先咽有淚淚  
 暗揮欲行心自傷欲留腹苦饑瘦馬怯上坂倦鳥  
 慵孤飛寒天催短景日淡無晶輝出門屢回顧漸  
 覺樹影微丈夫不得志去住與願違萬族各有托  
 我今將何依徘徊當林苑不期卒盡良女會為語  
 三十則除夕泊許墅齋中孤客凝望秋圃平

三十明朝是羈懷觸緒增雪中孤客路蓬底隔年  
燈攬鬢愁無那當杯淚不勝辛盤兒女會爲話旅  
人曾過婚丈夫不許去去卦與願  
漂零獻歲更南征擊楫初過第一程吳楚風煙愁  
遠夢江湖浩蕩寄勞生中流翠滴三山色東去波  
沉六代聲歷歷川途渺何極沙邊慚愧白鷗輕

舟中立春十六日

登盤細菜簇青絲坐對芳樽感歲時波浪天邊隨  
客遠風光帆底見春遲吳山的的如相送楚塞迢  
迢祇自悲回憶江村梅柳放鶯花取次動離思

贈戴綸長時同舟入楚

松竹風姿鶴性情相逢歲晚共長征寒江泊處同  
轟飲雪夜談時對短檠拋卻告身漁具在編來小  
集格詩成剡源他日論耆舊郭北溪南合主盟

和李受之秀才韻

客行向楚澤遙夜動吳吟共有涉江感因知怨別  
深望雲當落日聽鳥辨春林明發啼猿滿煙濤空

我心大正靜雲土孤舟夢中驚  
十五臘旅感登對重野邱  
白

十年飄轉倦登樓重理征衣寄薄遊殘歲辭家隨  
斷雁大江積雪上孤舟夢中涕淚違親舍天際雲  
山引客愁到日晴川添悵望萋萋芳草滿汀洲

天門

白浪天門斷千崖杳莫攀登艦一長嘯遙見謝公  
山我欲浮湘去行吟楚澤間今宵對明月把酒慰  
離顏

牛渚

牛渚西江下青天挂席來依然明月夜不見謫仙  
才清露霑衣久驚烏繞樹迴思鄉更懷古悵望迴

堪哀

然犀亭

空亭蕭颯荻花秋躡屐登臨豁遠眸日落倒窺巖  
洞黑崖傾猶見鬼神愁然犀赤憤驚牛渚灑泣黃  
旗向石頭爲問過江誰第一漫將人物數名流

樅陽懷古

樅陽何處射蛟臺漢帝樓船此地來望祀還臨天  
柱遠浮江直向盛唐迴珠簾甲帳神君至首覆蒲  
桃別館裁今日茂陵空寂寞秋風搖落不勝哀

過馬當

牛渚西來峭壁張，驚心如馬戒舟航。  
風顛雨急衝波沸，鼉作鯨吞巨石妨。  
自昔神靈傳躍鯉，幾人行止憶垂堂。  
何須灩澦孤根沒，一水牽愁萬里長。

望江縣道中作

西指柴桑波路賒，汀洲葭菼浩無涯。  
雲濤忽迷大雷岸，客夢遠繞長風沙。  
節物牽愁驚歲序，關河入望少煙花。  
檣烏渚燕空情思，倚棹微吟倍憶家。

江行雜詩六首

三山隱見蔽高岑，采石橫江天塹陰。  
正是客心淒斷處，誰家長笛起龍吟。

雁渚楓林趣放舟，吳津博望鎖洪流。  
行人指點紅霞外，謝朓青山李白樓。

雲際蛾眉疊翠屏，楚江浩渺浪花青。  
亂山兩岸天門斷，葉葉風帆破杳冥。

蠓磯西去返秦磯，荻港纔過又赭圻。  
齊聽榜人竹枝曲，沙明水碧雨霏霏。

潮至尋陽更不迴，馬當峭壁倚天開。  
遙看十丈浪頭白，愁殺南船上水來。

楊葉洲邊雨似煙，梅根冶外浪連天。  
那堪愁水愁風夜，秋浦猿聲到客船。

風交好小孤山下作賦

解纜溯層波夕宿逗沙岸亭亭見孤峰獨秀中流  
半陽崖倚巉巖陰岫屢回換半嶺微徑分參差更  
堪翫離離青松陰歷歷白石粲樓臺相蔽虧金碧  
窮照爛氛氲嵐彩明杳靄霞氣亂髣髴神靈雨東  
風一飄散湘妃出鼓舞漢女時游衍光景未易逢  
解珮徒深願悵然遲暮心重起越鄉歎

過彭蠡湖口

理棹始陽和結荷宿波路三江歷漭決五洲緬洄  
溯陽鳥得攸居我行不遑處睠茲彭湖口東隄衆  
流注披襟欣昭曠晞髮感遲暮春華曖澤蘭夕霏  
翳汀樹噉噉哀猿鳴歷歷翔鷗聚石鏡疊垠堦香  
爐對煙霧目接心成賞情遷境非故亮乏子春興  
頗抱呂梁懼矧復緇鬢改徒傷曜靈鶩廬霍有夙  
期繕性從所務

雨過彭澤

遠火楓林岸滄江暮雨時煙昏帆影滅雲合鳥飛  
遲粟里存高躅柴桑起夢思秫田如可種我欲問  
茅茨

九江舟中

西莊如存稿 卷四 五  
渺渺潯陽煙樹齊蕭蕭湓口雁行低長江九派東  
流去何事孤舟獨向西

湓城

湓城江岸對斜曛煙樹縈紆入楚雲歷歷帆檣迷  
極浦蕭蕭鴻雁感離羣天邊積水岨峽下鏡裏芳  
洲烏白分秀色芙蓉如可攬便思汗漫問匡君

九江舟中望廬山

昔有釣龍子遁跡匡廬巔手攀桂樹飲瓊液層城  
揮錫時騰騫茲山乃是列仙館穹崖上與丹霄連  
石門遙引虎谿勝圓闕秀裊香爐煙我欲南遊訪

衡霍泊舟遠向潯陽郭坐聽東林日暮鐘金光黛  
色空中落屏風九疊嵐翠濃宮亭倒影青芙蓉東  
南削出五老峰霞梯路斷莓苔封飛梁裊裊垂綵  
虹驚湍直下萬仞壁雪瀑亂灑千年松爲報廬山  
君便作廬山客長嘯入巖扃援琴坐盤石一臥康  
王谷口雲好修淨業謝人羣茹芝採菊我生事世  
上浮名安足論

即日

霽曉江光雪練鋪氛氲紫氣對香爐灌嬰古井潮  
痕動直到分流左蠡湖

琵琶亭

黃蘆苦竹夕陽斜，獨傍荒亭繫短槎。  
遠客青衫先自濕，不須商婦訴琵琶。

行次齊安暫寓江濱小閣

作客猶無定，登樓信可悲。  
飄飄逢雨雪，草草得棲遲。  
詞賦遊梁賤，衣冠適越疑。  
思鄉雙淚眼，日暮倚闌時。

鄂渚寄家人

楚樹吳雲別路遙，樊山夏口送征橈。  
淚痕欲向東流寄，分付潯陽上下潮。

寓舍春日雜題六首

江館蕭寥鶯語頻，天涯草樹一番新。  
辭家回首纔三月，眼底驚非故國春。

六枳編成池上籬，小桃勻注淡胭脂。  
朝來幾點催花雨，愁到春寒病酒時。

迢迢繡陌趁初晴，新燕參差宿蝶輕。  
鬪草踏青兒女路，風光容易到清明。

鏡裏芳洲杜若香，楚山杳靄楚天長。  
衡陽回雁無消息，漫寫家書細作行。

輕塵短夢試重論，檢點春衫浣酒痕。  
不用登樓頻



西齋女不私 卷四 七  
望遠武昌楊柳最銷魂

嫩雨柔絲逼禁煙東風花外冷啼鴉逢春莫怪添  
惆悵潘鬢今年異去年

憶兒女

苦憶嬌兒女纔逾學語年畫眉明鏡曉騎竹草堂  
顛離別愁渠小聰明得母憐攜家何日遂舊隱鹿  
門邊

懷鄉

客舍千山隔江鄉八口貧麻鞋長道路橡實度艱  
辛去雁書難達東風草又新何人共饑渴顧影獨

霑巾

旅興三首

一葉長風溯上游落帆黃鶴獨登樓千絲柳色迷  
江介八字山形繞鄂州漫擬依劉餘涕淚空憐弔  
屈感離憂懷中名刺今磨滅漂泊重來鸚鵡洲  
迢迢郢路古今情夏首西浮更遠征三戶遺墟春  
草碧六朝舊事暮江平米船誰遣迎溫嶠羽扇還  
須藉顧榮幾許興亡猶在眼漢南雲樹喚愁生  
大別山前落照頻南樓清景漫重論蘆中問渡真  
窮士漢上題襟少故人渺渺晴雲千里路匆匆歸

雁一年春秦川公子哀無限偶到登臨便愴神

大隄山春感

江南歸計尚遲遲三楚煙花恨別離少婦登樓撫

瑤瑟西洲芳草斷腸時

寄錢曉徵曹來殷家琴德諸子二首

經年未得故人書望斷江流西上魚黃鶴樓頭春

色滿煙波天際渺愁余

銅坑銅井菴東西此日梅花萬樹迷料得清吟香

雪裏扁舟同繫虎山溪

寄家鳳啣三首

青浦王 昶 琴德

分攜當歲暮雨雪滿關津忽見東風轉江梅又

早春音書愁遠道樽酒憶蕭晨何日謀棲隱羊

求結比鄰

天際碧雲合瀟湘春雁飛知君官閣裏終日對

清暉漢上詩篇好襄陽耆舊稀東風芳杜若悵

望挂帆歸

君家練水上雲木迴清虛我亦居三泖煙波足

釣魚耦耕知未得作客竟何如睽念瑤華至臨

風一起予

武昌客舍醉歌

挂席乘風來夏口千里江山落我手登盤且食武昌魚開簾况對宜城酒酒闌拔劍悲茫茫憑高落日懷故鄉南樓明月自清夜西門楊柳堪斷腸憶昔仙人駕黃鶴白雲一去翔寥廓楚王臺榭亦已蕪晴川芳樹還如昨世間萬事何有哉不飲空復令心哀春風吹花落如霰狂歌醉舞傾金罍只今生事仍羈旅漢水東流我西去鳳凰山北多浮嵐鸚鵡洲邊逢暮雨遙望荆雲蔽遠岑煙波江上獨愁心試將岐路楊朱淚寫入天涯莊舄吟

江行

沙岸明夕陽楚江歇微雨時聞遠寺鐘不辨煙村樹白鷺背人飛銜魚自來去

漢口

錦石清江望渺瀰開襟蘋末動涼颼千家樓影煙中見半嶺嵐光鏡裏移漢女弄珠無限意湘靈鼓瑟至今悲誰憐繡被熏香夜青翰舟中空所思

辛未五月二十一日三十初度在漢陽作

是年閏五月  
彈指韶華逐逝風匆匆及壯尚飄蓬生涯已付竿  
三尺舊宅閑拋地百弓卻怪黃楊逢閏歲祇疑磨



西華如存和 卷四 十一  
吳歛嫋嫋竹枝聲楚火迢迢兩岸明衣上曉露溼  
口雨船頭秋繞漢陽城雁鴻嘹唳涼初透楓相丹  
黃露乍盈顛顛關河爲客久西風搔首不勝情

過蘄州

暮雨過蘄州蕭蕭笛竹秋雲中下漁艇煙外隱江  
樓清景添惆悵孤帆昧去留寒波與衰草萬里信  
悠悠

遊赤壁

黃泥坂下樹冥濛石色楓林相映紅倚郭亭臺齊  
入畫臨江巒岫若浮空洞簫何處催斜照孤鶴無  
心掠短篷千載扁舟風月笛清遊誰復繼仙翁

九日漢陽旅次懷吳尊彝在薊門

碧雲吟斷送斜暉幾載相思兩地違江漢孤舟歸  
未得荆高舊侶信偏稀蕭蕭節序黃花老歷歷關  
河白雁飛強欲登臺舒望眼天涯霜露濕秋衣

襄陽曲三首

可憐大隄女花艷不知名嬌歌伴估客能按玉柱  
箏

可憐襄陽兒三五高陽池銅鞮歌未足還有播摺

詞

送歡桃林岸別歡魚梁洲悠悠江水深是儂雙淚流

曾船聯句

漁具譜松陵錢唐戴廷瑣細難盡悉排曾截眾流

吳縣吳坐獲利饒溢云何方俗殊仁和李汪巧便

創新術往來惟以船盛鳴提挈利用繹構架藏機牙

塘廷張捕投沕滴頂懸翠竹環神底結銀絲密平支

二弓交度汪高擎一面出目細難逃虛盛鳴鱗觸知隙

室倔強騰有神塘廷撥刺勢已失慘滄置勿庸神答

奢滿可必喧喧陋榔鳴度汪戢戢論斗率得穴何待

丙盛鳴作羹定去乙下酒給于鮮塘廷泥飲笑乃啞我

儕倦風塵神秋思轉蕭瑟設鱸慳姜侯度汪挺又詠

韓律會須學漁蠻盛鳴煙波泛家室塘廷

假玉杯聯句

世抱荆璞泣塘廷燕石久相假耀目競璨璀神充貨

到杯筍晶潤匹截肪度汪圓肉類合瓦頗費雕琢工

盛鳴亦受醪醠瀉大小户分曹塘廷雪月賦共把行當

埒賓筵神匪直炫里社居然貌温其度汪莞爾笑識

者真棄贖乃收盛鳴碁多玉斯寡裹以重錦緋塘廷盛

之文梓櫝混淆目比珠神髣髴鹿指馬物情但好

似汪論品肯居下一粲攜歸裝鳴從衆吾其且熈

紅葉聯句

秋帆凌漢川清淺水失涿翀燄燄翻寒楓亭亭似

麾幢盛枝看改舊綠葉乃露新絳翀爛熳奪春葩

殷鮮照深巷盛攢叢接飛霞浮彩映落虹翀硃砂

散塗抹珊瑚碎擊撞盛飄來波亦明染出霜乍降

翀逝將返故林歲晚守迂菴盛

打稻聯句

場圃因時築霜天刈獲皆熈耘牀分戶設墉櫛逐

村排翀耦立重重舉齊聲挫挫諧汪呼羣喜鶯鴨

策力競兒娃盛白汗沾衣結花兜裹髻釵熈頭揚

頻見掉手運遞為义翀已脫將臨確全除肯棄藍

汪紛紛餘粒墮撲撲積薪挨盛地燥乘晴日芒枯

捲疾颿熈量時珠顆滿堆處寶光佳翀人有遺銖

利家供納秸葦汪自膺田畷喜不慮里胥差盛飯

熟香盈甕篋成釀似淮熈服牛牽碌碡迎虎踏芒

鞋翀驅臘行將及汙邪祝自偕汪江鄉景可繪客

眼看還措盛學稼情真愜為農願未乖熈但安耕

鑿穩何惜姓名埋翀風物詩人紀田園客子懷汪

石湖遺句好相約返荆柴盛

分詠得市燈

未罷江村市微茫遠火生過橋人影亂入夜酒帘  
明岸角籠煙出樓頭帶月清漸聞街柝響舟泊欲  
三更

得村燈

吳翀

黃葉村邊過熒熒入望中籬疎明遠近犬吠辨  
西東影帶風林動光侵月渚空從知農事畢夜  
語一篝紅

得桅燈

戴廷燴

一岸停官舫高懸照水燈帆檣風色迴旌旆夜  
光增月映搖還定星聯降復升低篷擁被客滅

燭思曹騰

得漁燈

李汪度

夜火掀篷見蒼茫楚澤過風生光不定月墮影  
偏多忽聚黃蘆岸遙明白板波低徊故鄉憶湖  
上聽漁歌

述感

渚清沙白偶登臺城闕秋生夕照催醉裏高歌雙  
鬢在愁邊畫角數聲來側身天地長爲客抱病風  
塵孰愛才卻憶故園三徑好扁舟須趁早春迴



西莊始存稿卷四  
三野秋風  
早春風  
白雲  
高樓

高樓

高樓

高樓

高樓

高樓

高樓

西莊始存稿卷四

西莊始存稿卷五

古今詩 登樓集

江陵樂三首

江陵路三千來往盛行旅郎愛撐獨篙儂愛搖雙

櫓

高帆健如馬對面不得應朝來發白帝日暮宿江

陵

連檣估客舟齊泊沙頭市相邀宴高樓作使江陵

伎

梁元帝廟行

青絲白馬圍臺城湘東萬騎歸江陵枕戈嘗膽徒  
虛語行師代景紛相乘長沙旣破同氣盡才子併  
命殊堪矜夏口已聞肆魚肉荆門復見除股肱胡  
豆洲前狂賊死登壇慷慨稱中興羣僚累表頌符  
瑞爭誇紫氣交環緱當時文軌僅千里郢都蕞爾  
良難憑如何建業不復顧欲取荆楚當殽澠殿中  
輟講寇已至枇杷門外愁雲凝龍文玉軸一朝毀  
拔劔擊柱空摧崩何年廟食尚遺迹三楹茅棟連  
溝塍殘碑蒼蘚巫覡斷無復社鼓來鑿鑿嗟哉章  
華亦漫滅况乃此地荒榛芴行人下馬一憑弔興

亡過眼如風燈

月

三千里外月一十二回看此夜流輝滿仍憐獨客  
寒方諸隨淚盡破鏡欲歸難念爾南飛鵲爭枝亦  
未安

發江陵

一鞭曉出郢亭西雲色煙光極望迷臨水長隄秋  
草綠背城村舍午雞啼瀟瀟雨濕沙頭市渺渺帆  
歸燕尾溪儻得郊園千樹橘便堪穿徑結幽棲

峽中寄遠二首

縹緲陽臺隔九疑楚峰十二碧參差鷓鴣啼遍黃  
陵廟腸斷空灘落月時  
漂泊真憐汗漫遊五湖煙景滯歸舟淚痕卻似嘉  
陵水長繞巴江碧玉流

虎牙灘

前日過銅柱今晨望虎牙性命付孤舟急灘紛若  
麻江束湍漸怒轟轟走鳴沙亂石森牡齒揭天虎  
口呀懸流觸石轉百折飛浪花有時噴淖起水石  
相豁舒斗蠹一間屋盤作千尋窪俯愁裂坤軸仰  
見側日車偶與齋俱入便闖龍伯家柁師工撇揆  
凝竦不敢譁狎恰已出險身手良可誇桅燈步頭  
艤旅鬢悲髮髮饑寒真有力迫我輕三巴

十二碛

我帆拂宜都西上江愈窄懸流射水府喧颺動地  
脈未躡三峽尾已見五龍脊巴山何怪偉巉巉積  
鐵色向江疑奔趨背江若崩圻獨立旁無依競起  
勢相敵如婦頽髻鬢如士操劔戟如鬼欲搏人如  
鳥忽墮翮如粟堆困箱如屋建瓴甌圓如挂金鉦  
方如排綺席橫如聯行陣直如削刀尺整如布溝  
隴碎如疊摺襍坳如匏作樽突如蓮破葯重重互

西華女存稿 卷五 三  
掩蔽朗朗各分析飛梁架空青深洞穿虛白約數  
得十二荆門此盤扼磔碗多殊形有語窮刻畫聞  
昔黃牛神治水佐禹力云何作遊戲輦聚千萬石  
壅激成驚湍往來怖行客孤舟犯波濤遠望淚橫  
臆何當呼五丁試手鏟絕壁

蝦蟆碚

峽山多異狀此碚尤怪竒爬沙金背蟾高坐張其  
頤可憐腳手鈍終古江之湄何不隨姮娥飛傍桂  
樹枝婆娑玉階側清光分半規老兔操杵臼妖蟄  
技安施一朝化爲石蹒跚任支離飲江江不盡饒

吻流涎垂水簾出神漢活碧搖淪漪繫舟聊試茗  
颯颯江風吹

宿下牢溪

酸風苦霧暮江昏急碚驚灘怒浪翻孤客聞猿宵  
墮淚居人畏虎早關門三遊古洞空遺迹四品名  
泉孰細論愁絕結荷燃楚竹天涯真有未招魂

荆南發舟溯江抵夷陵即事述懷寄琴德  
來殷一百韻

萬里身爲客三年跡屢移風塵看老大湖海足艱  
危暮節冰霜慘荒城草木衰將浮夏首權初別渚

宮湄世事蓬飄日生涯梗泛時書籤慵不理藥物  
病相資冉冉檣烏颺飛飛塞雁隨回瞻一柱失遙  
指下牢期間渡招獻父揚舲信檝師高岑蔽荆闕  
古縣入松滋山市戎戎暗溪流泯泯遲層巖攢橘  
袖淺渚曬鷓鴣傍水侵星宿凌晨斫竹炊浮踪方  
浩蕩前望益逶迤聞說丹陽道還從勾亶遺細腰  
誇婀娜長鬣笑躑躅苔沒孱王塚煙迷故國基圖  
經紀熊繹井邑問鳩茲岸轉翻紆曲峰尖露險巖  
九迴巴字繞百折峽形竒亂石灘橫斷驚沙雨倒  
吹蘄嶠多欲落白勃忽相持百丈牽難上雙厓隋  
莫追濤頭裂地起燒火入雲疑處處菁茅暗叢叢  
箇籜垂虎蛟饑掉尾龍鯉怒揚鰭林黑楓人出沙  
昏域弩窺畏途何偏側顧影獨嗟咨南紀程初到  
西陵纜乍維獠亭詢舊址埵竈讀殘碑勝地標雄  
鎮空舲倚峻埼嶂開芒似戟嵐簇黛成眉懷古興  
憑弔披襟眺渺瀰秦灰餘泱泱楚望躡屣屨尚想  
英雄輩都非豚犬兒孫劉紛列戍遜抗各登陴復  
漢情徒切吞吳計竟隳呂蒙營在否步闡迹留斯  
折鏃沉荒壘遺墟蔓碧落蒼茫通越雋空翠極巫  
夔宛宛黃牛像冥冥赤帝姬雨雲連旦暮十二碧

參差怨入女嬃杵魂傷正則纍蕭條魚子國寂寞  
竹王祠延覽窮今古句留慰旅羈壺公聊賣藥巢  
叟自依枝郡廨鄰鮫室人煙混島夷座隅防見鵬  
牀下任支龜草草謀高枕匆匆亦插籬辭家同士  
爨懷土類鍾儀祖竹編烝汕王魚供朶頤綠蘿谿  
路好椒紙土風宜亦有紅蓮稻非無紫色梨猪肝  
雖累俗蟲臂豈謀私卧聽吟蜻蛚醒聞賣蛤蜊且  
看劔開匣判倒酒盈甌蜀魄催歸去江萍解渴飢  
自憐心欲折漸見鬢添絲往日殊堪惜回風愈可  
悲遂多哀郢作更擬卜居辭漫動懷哉歎終愁和

者誰故園誠可念二子最相知意氣行衰矣關河  
况間之雲停多悵快月落重吁嘻每憶膠投漆真  
如鍼引磁招要來白室晤語到緇帷素願甘蜚遜  
高情恥嗶呀藏山方號璞斷尾憚成犧暗室還交  
勗垂堂亦互規由來盟道義不擬逐喧卑石壁探  
書庫珠囊理易旗奇文當秘寶妙理作良醫共抱  
栖元志俱懷避俗姿討春常把臂選勝溯涼颺雪  
霽探茶磨朝晴過劔池中峰窮窳窳胥口泛淪漪  
遇寺尋支遁逢溪訪戴逵聯牀同話雨把酒便論  
詩刻得五分燭彈殘兩路碁但欣長邂逅詎解暫

睽離更愛松毛屋斜臨扈瀆涯比鄰曾訂約卜宅  
最堪怡牖藉枯藤縛橋因卧柳爲秋原開吉貝夜  
籟走彭蜺佑畫師懷瓘煎茶仿季疵何妨餐野菊  
兼可摘神芝一自辭鄉國反教走路岐行行莽牢  
落望望感淒其登笠何由接津梁已久疲頻看締  
葛換數睹兔華虧白馬吳門影烏蠻楚塞崖那無  
平子歎自發伯鸞噫念爾今離索祇應守默雌饑  
鷹垂翅伏老驥帶瘡羸僕輒嫌夫孺童偏笑叔癡  
怪來違尺素好在舊茅茨偕隱能如是耦耕俟我  
而行當拂衣去欣見挂帆欵望遠憑鱗雁臨風擷

蒞離合并堪計日先爲寄相思

夷陵遠望

古戍標荆塞危城見蜀津雲移三峽暮江接百蠻  
春行役何時已音書總未真登樓欲有賦感激獨  
傷神

月

昭君村畔月還似漢宮秋近水清輝滿當天素魄  
流徘徊掩蘭燭悵望下簾鉤何處吹蘆管伊伊攪  
客愁

懷鄧尉

西華女存和 卷五  
輕嵐淡靄映湖光回首清游興未忘一徑松陰秋  
入畫三層水閣夢生涼風帘雲碓宜晴日礪草巖  
花出異香惆悵軟紅欺客袂幾時洞口結書堂  
曩與商寶意定交吳門辛未入楚聞其赴  
官施南不得往晤寶意旋以近著寄示即  
用卷中感舊韻卻寄四首

邂逅曾題吳苑襟空園十畝五湖陰倒囊快誦斐  
然作接席因知靜者心南楚北燕羈旅慣春鷓秋  
蟀別離深相思莫訝飛沉絕感激難忘是賞音  
一辭華省縮符行瘴雨蠻煙觸目驚頓遣炎荒留

好語未緣簿領損高情巴童歌舞迎官騎楚客招  
要訂舊盟料得琴牀容坐嘯西山拄笏有餘清

詞源浩泝自無邊髣髴新排長慶年游戲何妨參  
變格波瀾終覺近前賢謫居更得江山助遠道休  
悲坎壈纏淡墨歆傾三過讀不辭燭跋夜頻然  
自憐短翅只卑飛三十韶華急景非技比屠龍難  
濟用工成刻楮定知希何時崔策遙相訪爲報區  
宏且忍饑搔首南天聊問訊亂山落日莽相圍

新四詩暮秋客感集杜句哭黃州青蓮體去來

秋盡東行且未回茫茫庶事使人猜蒼苔濁酒林



西華女存和 卷五  
中靜風急天高猿嘯哀歲暮陰陽移短景一生襟  
袍向誰開舌存恥作窮途哭黃帽青鞵歸去來

宿仙桃鎮

沔水西來送楚舸佳名小市記仙桃聯拳宿鷺蘆  
中起的皦明沙浪裏淘農喜有年登晚秣客愁無  
賴托香醪挑燈默數經行處鴻爪平生信所遭

戲贈綸長

酣呼跌蕩少年場幾許風情老更狂愛鬪南朝金  
葉子閑翻北調玉蛾郎弓衣織得傳詩句藤笈攜  
來檢藥方最喜合并湘漢側酒闌欸欸話歸鄉

郢中旅興同曠魯之作

荒江郢樹入寒煙萍梗孤蹤任播遷明月珮空神  
女迹清風臺說楚王年謀身自斷無長策學道終  
期謝世緣從此徜徉浮七澤釣竿詩卷興飄然

壬申元日

官閣梅花發清樽柏葉新仍爲千里客漸近二毛  
人倚杖看雲久悲歌撫劒頻椒盤思舊里望斷白  
頭親

江南曲

高樓臨江隈江船樓下開借問船上客恐從故鄉

來對詞玉期心誠不聞音問上多誤  
武昌權歌三首

客船上武昌翩翩似飛鴉  
統如鼓聲起知是迴帆  
搗

安西大船來津吏相逢迎野人  
小船來辛苦沙頭  
行

發船船官浦藏船鸚鵡洲  
悠悠西洲水望見武昌  
樓

登黃鶴樓

萬里江天煙霧開上頭棟宇鬱崔嵬  
荆門曉色當

牕盡湓浦春濤繞座來  
終古白雲餘斷靄數聲玉  
笛落殘梅茫茫人代銷  
沉去拍檻狂歌思轉哀

彭湖晚泊

黯淡平湖暮春波漲遠空亂帆  
楓岸火細雨鯨魚  
風九派身猶滯三江路欲窮  
明朝望匡阜留賞莫  
匆匆

小孤山二首

小孤山色對彭郎綠黛青螺望  
渺茫千頃宮亭湖  
似鏡朝來鬢鬢見新妝

霧閣雲牕碧四圍天風長拂六銖衣  
一春夢雨飄

蕭處惟見神鴉接飯飛

牛渚晚泊

詠史當清夜誰逢謝鎮西徘徊風露下江月向人  
低

雨泊江岸登天門絕頂

我從南楚浮歸舸中流浩蕩乘長風布帆高挂似  
飛鳥飄翩直指天門東插江翠壁相對出遙見突  
兀青濛濛削成疑是巨靈掌移置定出夸娥功須  
臾雲起飛雨集白頭怒浪掀孤篷舟師相呼入浦  
漱繫纜急傍菰蘆叢興來便攜九節杖思縱遠目

開心胸潺潺絕澗蹋亂石層層仄磴攀枯松振衣  
千仞發長嘯驚起鷗鷺盤高空峻嶒兩崖勢忽斷  
岷濤萬里流當中始知楚關此天險屹立一鎖洪  
波衝是時陰霞散晚霽江光隱見磨青銅欲從牛  
渚呼謫仙更向青山懷謝公東望石頭互虧蔽迢  
迢天闕排龍嵒興亡六代付逝水人寰刺促悲安  
窮終當挹取玉漿飲上吸倒景騎飛龍

歸至金陵暫憩燕子磯清江院

虎牙銅柱倦登攀無恙孤帆此日還遠夢尚驚三  
楚浪舊遊重看六朝山蕭條行李誰知己濩落風

塵損壯顏愁絕白門楊柳色應同庾信賦江關  
難憑忠信問靈胥幾向彭咸賦卜居命托烏蓬何  
地穩夢迴魚腹此生餘十年被濕唐衢淚四海途  
窮阮籍車出險驚魂重說險誰家飽飯在田廬

真州城外作  
擊汰揚舠下石頭白沙亭畔暫維舟  
桃飛紅雨斜臨水柳縮青絲故入樓  
已悔遠遊勞馬策合將心事付漁鉤  
明朝揚子津邊渡相望家山足散愁

舟次蕪城月下聞笛  
遠客辭巫峽歸帆一葉輕  
春江花月夜獨宿廣陵城  
水調愁何極金波暗欲傾  
竹西歌吹好偏作斷腸聲

登金山二首

振策金鼇背上行江山極目勢崢嶸  
層層彩翠空中落片片雲霞檻下生  
萬里岷濤疑震蕩九枝海日自分明  
憑高長嘯臨無地吹出天風玉笛聲  
涵虛傑閣削芙蓉更向留雲策瘦筇  
洞口煙蘿浮玉鏡上方仙梵荅魚龍  
江天自昔傳高詠海嶽他年溯舊蹤  
便欲紅顏生羽翼三山浩渺足追從

歸舟

江海三年客扁舟指舊鄉  
 欣聞吳語近轉慮石田  
 荒夜火錢門市春潮郭澤塘  
 妻兒計程待知己具  
 壺觴

西莊始存稿卷五

西莊始存稿卷六

古今詩 還山集

還家即事四首

鳥雀柴門噪歸人  
 罷遠行牽裾他日恨  
 置膝此時情力養  
 嗟何有幽居計未成  
 還須謀半菽荷鋤及

春耕

蓬鬢荆釵婦羈離見汝難  
 愁來停織素書到勸加  
 餐萬里征衣卸三年客  
 淚乾鹿車曾有約井臼  
 能安

吾道甘從拙人間底事無  
 雞蟲空得失蠻觸任喧

呼陸賈金仍罄陶潛徑已蕪舌存聊慰藉不復計窮途

大瓠真無用勞薪祇自憐狂思餐玉法貧索作碑錢竹映開殘砌牀空理舊羶朋交肯相過剪韭話

燈前謂琴德來殷

自題楚遊吟稿

三湘七澤感羈離憂患餘生兩鬢絲比似當年孫

學士篋中剩有未申詩吾鄉孫先生致彌以康熙辛未壬申二年坐累頌繫

賴聖祖察其誣復原官擢至侍讀學士其詩名未申集子遊楚中亦值此二年旅况艱辛有窮途之戚歸次金陵向晚行至黃天蕩忽遇狂風簸蕩怒浪中自必覆溺至曉始達儀徵其所遇危困

與先生相等也

為吳企晉題秋江歸興圖

吳郎逸氣今希有往往新詩滿人口醉後高歌神

鬼驚狂來擊劔蛟龍吼一朝作吏別鄉關刺促何

時得解顏悔拋猿鶴牽微祿每話尊鱸望故山故

山煙景何駘宕藥闌花徑都無恙向禽五嶽憶前

期求點中年有微尚皖水迢迢趣放舟探竒應指

謝公樓天邊楚水楓林暮夢裏吳江芳杜秋秋風

寂歷寒江樹接羅紗帽隨鷗鷺宛似陶潛歸去來

相逢梅福幽棲處示我秋江歸興圖開緘粉墨遠

西東如存和  
糲糊玉簫金管中流好隱几揮毫底事無我亦天  
南浮短楫涉江直溯空舫峽萬里誰憐客思孤片  
帆祇覺歸心愜故園耕釣足平生石室銀房相向  
明與君鼓枻滄波去始信巢由無世情

谷水垂綸圖歌爲琴德賦

吾兄磊落非常儔蕭然窮巷百不憂忍饑誦經銷  
歲月閉門覓句工雕鏤草堂前對谷水流紅泉碧  
樹蒼山浮有時散髮扣舷去狂歌一曲凌滄洲竭  
來金閭數相見平生知我甘窮賤吹簫擊筑多故  
人十干沽酒同歡宴酒酣起舞首自搔當杯心共

孤雲高丈夫生世不諧俗便當湖海終藏逃故園  
况復堪吟眺鏡裏晴嵐滿雲嶠扁舟已息漢陰機  
短笠將隨任公釣偶然遣畫垂綸圖撈蝦射鴨皆  
可娛嗟我落拓胡爲乎北燕南楚空馳驅蒼茫葭  
菼平波外何日相從陸瑁湖

贈惠定宇

空谷斯人在歸山獨下惟窮經惟復古守道不干  
時洞擬題三詔詩應續五噫我來因聽講長與白

雲期

贈趙升之

西在治字高

卷六

三

書劔飄飄白髮侵故人邂逅得開襟閉門好著潛  
夫論擁鼻還成洛下吟命駕相從感知已耦耕何  
日遂初心黃筍一曲時爭賞莫遣輕彈太古音  
空谷俱同沈歸愚先生翁朗夫周欽萊顧祿百朱  
吉人沙斗初朱適庭吳企晉趙升之蘇顯  
交乎武之曹來殷家琴德集城南聽松軒聽張崑  
南彈琴  
江關作客空蕭索筇屐相過且爲樂吹簫磨鏡多  
故人隨意招邀共絃酌松陰滿地凝層冰竹影入  
簾墮寒籜崑山人磊落士能向枯桐辨宮徵廣

陵清散不易聞抱琴忽復來吳市虛堂籟靜風襲  
衣練心戢志通元微低徊抑按轉寥聞徐拂商絃  
手乍揮楓林蕭槭縈煙霏素雪冉冉雲依依青蒼  
巫峽幽湍瀉寂歷湘波木葉飛迴絃換調彈角羽  
萬壑驚雷噴秋雨天馬空山意未平離鸞中夜鳴  
偏苦斯時主客各悵快四顧茫然絕心想我昔遠  
溯巴江湄冷雁哀猿雜竹枝章華月黑鬼語切陽  
臺雲暗灘聲悲金徽瑤軫寫未得沒和騷些多文  
辭今來一聽滄浪吟舊遊髣髴情難任嗚呼古調  
世誰識差喜數子餘知音還將園客絲中理遙契



成連海上心

懷匡廬五首

昔鼓九江棹遙瞻七嶺重空懷遠公社未踐羽人  
蹤招隱橋邊水棲賢谷外峰何時綠玉杖扶我入  
雲松

十八高賢後長留講誦聲巖棲陸修靜仙詠湛方  
生澗挹聰明味菴仍錦繡名蒼顏五老在魂夢愜  
幽情

聞說開先寺遙連三峽橋桓伊曾結托吳猛最消  
搖但得常餐玉何須有賜貂好攜鐵如意重赴虎

谿招

萬古黃崖瀑銀河落半天擘開青玉峽倒挂谷簾  
泉晴日蒼龍舞空林素練懸宗雷多道侶飲犢向  
巖邊

回首落星石湖光混太空雲迷天子鄣春老孟婆  
風圖畫金箱在煙霞磴戶通君平定相笑容鬢已

成翁

豫章舊志匡  
俗字君平

自題禮堂寫書圖四首

十齡操管鬪雄豪轉眼年華到二毛準擬止園終  
養志早將寫定示兒曹

古文奇字有門庭北海司農實典型小說虞初從  
 撥棄區區一意在尊經平華經二五擊毬五園然  
 鞍背船脣萬里賒歸來散帙恣搜爬腐儒活計雖  
 寒乞一室圖書尚五車

馬癖錢兄各有營傳鈔聊足樂平生迂疎難入時  
 人眼敢向文場學噉名

題王鳳喈孝廉禮堂寫書圖

當代經神擅衆長端居人比鄭公鄉映階書帶  
 憐春草過眼年華畏夕陽詞賦共推新著作畫

圖真見古冠裳膠城不隔東南望他日抽帆問

禮堂

同悉又信一武萬古雲雲海上海趙文哲升之

盛漢二十葉卓犖多儒宗珠囊蒐采凡幾輩大  
 成集者推鄭公三年扶風侍絳帳咨嗟我道從  
 茲東鍼盲起痼括羣籍何獨三傳煩芟礪傳家  
 七十按禮典趨庭有訓抒深衷自言名山抱餘  
 憾日暮途遠悲匆匆文成百萬古未有如遊東  
 序鏗鐘鏞想見禮堂競傳寫趙商張逸趨雍容  
 已辰一夢忽千載徒令後死心怔忡王郎高步

起東海青箱舊學傳無窮蓬蒿聊爾隱仲蔚湖  
 海誰復知元龍西莊一編振逸響朱絃疏越何  
 颯颯平生讀書志經術恥逐下士誇雕蟲力攻  
 偽書著從朔大航破冢羣疑空金昌亭邊一握  
 手示我圖畫非徒工秀眉明目自軒舉意氣真  
 有前賢風羣書徑思隻手定操戈入室將無同  
 我美朝八百應鴻朗蘭臺東觀高龍從諸經異  
 同悉考訂一洗萬古雲霾霽兩京盛事詎足數  
 直與三五相追從君才決起會有日未許終老  
 空山中明堂典冊藉大筆百斛之鼎千鈞弓攝

衣抗手折五鹿鏗鏗伉伉驚凡聾歸事著述應  
 未晚儒林百代淵源通登堂倘許問竒字江湖  
 一舸來吳淞

贈內十首

子虛漫擬賦凌雲四壁蕭然硯欲焚秋雨茂陵人  
 臥病彈琴閑對卓文君  
 十年負戴伴滄浪搵盡牛衣淚四行布袂蒿簪看  
 不厭佳人難得是糟糠  
 明鏡朱顏祇自憐斷腸錦瑟送華年水天舊事從  
 頭說一枕斜陽短榻邊

西莊女不稱  
卷六  
稻花香裏樹冥濛竹塢梅坪岸岸通長憶江村攜  
手處紙鳶燈影鴿鈴風  
碧漢銀河小閣隈流螢幾箇墮蒼苔新涼絮語三  
更後小立仍歌起夜來  
漂泊淮南歲月侵隋隄柳色正春深暮天飛起花  
如雪卻望江南傷客心  
空房小膽劇淒清夜火荏苒事可驚記取寒衣縫  
未了矮牕重試紡車聲  
上計翻教典嫁衣黃金臺畔掉頭歸迎門能作如  
臯笑敝盡貂裘亦下機

涉江直溯下牢關聽徧猿聲西塞間解唱風波公  
莫渡今宵剪燭話巴山  
偕隱心期已久虛打量一舫載圖書五湖煙水浮  
家去不把求官苦勸余

青浦張處士結廬先入墓側畫白雲廬圖

索題

夕陽黃葉接寒蕪風木蕭蕭丙舍孤愛爾硯池餘  
孝水自能和淚寫橫圖  
高樓綺疏開繡戶自相屬中有嬋娟子容華世所

獨曉夢日三竿春遊裙六幅閑來弄丹鉛時或理  
箏筑笑金寧計千量珠應論斛昨宵媒氏來云有  
豪華族阿母欠端詳製我嫁衣服含意羞自陳蛾  
眉已暗蹙願此窈窕顏委身配凡俗文爾賦出翁  
同琴德來殷過滄浪亭

滄浪亭子遠聞闌構椽竹石安如山濯纓人去幾  
百載賸有野水流琤潺我來暇日問遺跡藤鞵栗  
杖窮登攀老木千章幕濃靄踈籬六枳緣荒灣牆  
陰縱步度危狎坡陀犖确高孱顏亭空無人俯寒  
碧溟濛玉鑑相回環淵注渟著清見底藻影浮動

沙紋斑跳波時聞戲魚響搖風亦有殘荷殷傍檐  
遙岑出復沒髣髴朶朶青煙鬟北碕精舍更可訪  
經聲粥鼓門常關還尋曲徑入蒙密不辭剝啄敲  
銅鐶摩挲舊物石枰在鷺鷥飛去殊蕭閑憶昔長  
史負竒氣詩筆追逐歐梅間無端騰謗便遭斥坐  
令幽桂遺榛菅禍機卒發洵可畏使我望古涕洟  
潛當年扁舟足嘯傲掉頭不受南陽板滄浪佳景  
天乞與一丘一壑何曾慳我儕世網厭羈束欲將  
家具隨魚蟹此間高臥計亦得江湖野性同踈頑  
徘徊臨眺未忍去回首初月林端彎

寄趙文學晴川

先生海上營幽棲滄波浩渺親鳧鷺草堂瀟灑之  
長物插架萬軸牙籤齊就中惟刪貨殖傳魚經蟹  
志俱參稽金石集古尤所好珊瑚鐵網留標題興  
來臨摹亂真本墨池怒捲煙雲迷有時探幽過近  
局江村佳處閑登躋開門桑柘綠搖影繞宅穉稭  
秧分畦眼前正壑恣欣賞不用五嶽凌丹梯趨庭  
才子識竒字謂升雅志高蹈躬耜犁調餐更謀潔  
白養那必茅屋輸金閨先生七十腰腳健尋山不  
藉扶青藜龐公盡室入峴首漫郎放棹歸洄溪人  
生樂事在適意一笑塵俗喧醯雞我家練祁水一  
曲田廬不遠高橋西他年抽帆載酒至撰杖脫屣  
相招攜

題趙文敏太真上馬圖四首

上陽花木翠成堆蹠蹠連錢侍輦來寫出新圖趙  
承旨未輸江令擘箋才

繡嶺蓮湯引曲池傳呼中使漫遲遲海棠扶起嬌  
無力玉勒青絲緩控時

細柳新蒲澹蕩春昭陽第一更無倫卻憐素面朝  
天去別有平明上馬人

西華如存稿 卷六 十  
一出延秋過渭川縈紆雲棧路綿綿六軍駐馬空  
遺恨還憶金輿扈從年

無名 夜過沙湖

濕螢點點出林多月黑沙明水不波卻似舊遊湘  
漢夜滿天涼露滴漁蓑

宿葛龍鎮

刺促辭家路更遙荒江獨宿意無聊遠林葉盡明  
村火淺港沙寒縮暮潮月底斷鴻空嘒嘒風中殘  
荻自蕭蕭蓬牕黯慘昏燈影又是天涯第一宵

題舍弟廷諤畫二首

柴扉草閣對秋江亂葉紅堆老樹椿讀罷黃庭無  
一事開簾嵐氣入西牕  
焚香掃地足徘徊試瀹春旗活火催寂寞寒山人  
徑斷有誰扶杖過橋來

王壺翁朗夫飲酒圖

先生抱道耽林泉先生下筆飛雲煙偶倩良工圖  
飲酒此中妙理忘蹄筌斐几無塵地衣靜方袍烏  
帽疑神仙蒲萄濃似鴨頭綠舉觴一笑臨風前  
來中吳領吟社山遊水泛羅羣賢鷓鴣之杯鸚鵡  
杓四座鯨吸空長川先生獨醒不復飲忍寒默聳

山字肩自言三蕉輒醉倒戶小漫羨斗十千乃知  
醉翁不在酒寓意聊爾全其天平生抗懷千載上  
俯視人世空茫然畢卓劉伶何足擬前惟彭澤後  
青蓮山中少野志無盡此亦情大所出  
次上外贈尤穆齋水部四首外雲對謝前身工圖  
玉壺風度重鴛行佳句西崑獨擅場帳殿曉趨賡  
韻捷戟門晝靜檢書忙聲華韋曲原無匹煙月吳  
山最不忘準擬相從頻載酒五湖深處和滄浪  
回首冰霜絕塞行謫居翰墨有餘清留連風月皆  
忠孝揮灑才華本性情詎止芙蓉映初日直看碧  
海掣長鯨一編細把燈前讀病眼摩抄分外明  
官齋蕭寂似山龕性相元宗一味參問法祇應師  
點點忘言早自契三三拈來妙墨閣浮汁悟到空  
香優鉢曇取次梅花破殘臘幽懷恰向箇中探  
消渴空慙短鬢侵卻欣邂逅豁塵襟疎簾清簟銜  
杯話細雨檐花剪燭吟敢擬披圖成主客何當把  
臂入雲林十年憔悴江潭夢始見憐才一片心

偶題

騷雅原同祖齊梁莫漫輕少陵推小庾供奉似陰

鏗



懷人絕句

長洲李碩夫處士著有詠歸亭詩集

詠歸健筆最嶙峋短律長歌妙入神野史亭中如

論定他年詩老屬斯人吳江沈冠雲徵士

吳江沈冠雲徵士深於經義

經傳紛綸滿腹儲百川疏導得歸墟如何制作修

明日不遣斯翁議石渠常熟王次山侍御

白簡威稜凜似霜蘭臺筆札擅三長歸來松菊仍

無恙好續風流拂水莊

長洲蔣迪夫太史修郡志多蒐軼事

一脫朝衫臥稻塍生涯雪屋紙牕燈中吳舊事煩

傳寫彷彿當年范致能

會稽商寶意郡伯

橐筆長趨清禁鐘一麾出守近廬峰藤梢橘刺交

廳事吟對屏風九疊濃

嘉興錢坤一徵士時客京師

仲文古調邈難攀燕市悲歌數往還此際討春應

出郭瘦筇圓笠大房山

如臯姜靜宰孝廉大器存自

如臯姜靜宰孝廉大器存自

西莊如存稿 卷一  
倦遊歸去掩柴門仰屋調饑大雅存自說撈鰕此

生足蕭蕭煙水白蒲村

靜宰所居

長洲惠定宇文學

紅豆先生子撰述最多又嘗注漁洋詩

紅豆風流啟後賢鏗鏗伉伉腹便便世人未得窺

新著只愛漁洋有鄭箋

常熟邵荀慈太史

退食金坡逐勝遊匆匆驢券漫勾留虎坊槐市題

襟處回首升沉動別愁

上海曹鴻書孝廉

京華旅食鎮相於顧我秋霖腹疾餘剩有好詩抱

山去故應同作暴腮魚

德清徐陶尊上舍

著綠衫野屋詩子絕愛其嘉靖蘸壇茶瑱

歌一篇

兀傲詞場獨擅雄一篇茶瑱句尤工煙波茗雪溪

流好輸爾孤吟漁笛風

青浦邵玉藻文學

青門一士愜心期谷水崑山話舊時今日西風遼

海畔秋墳空唱鮑家詩

旅次對雪聯句

作客欣得朋

鳴盛

畏人但枯坐黯黯愁雲凝

長洲吳泰來企

晉稜稜寒意作槎枒古木撐青浦王昶啁啾凍雀餓

六花舞檐楹上海黃文蓮芳亭四野洗坳堞試手龍公威

上海趙文哲升之啓塗玉妃佐灑空密復踈上海張熙純策時碾

塵揚更簸枯篁折有聲嘉定曹仁虎來殷老屋壓欲破割

面酸風火盛鳴分曹酒户大偏提有童攜泰來不托任

油澆韭芽糝吳羹昶蜜餌歌楚些食單列無多文蓮

清詩聊可和炙硯白戰酣文哲燒燈紙牕課句吟馬

耳埋純熙狂擬驢背馱我儕尚羈孤虎仁生涯益摧挫

今秋苦霪霖盛鳴連村壞秫稷窮子嗟無衣泰來勞人

憐孔痺所望宿麥登昶庶資春種播對景差足歡

文蓮稱瑞行當賀蝻蚰類盡殲文哲霜松樹頻裏一飽

諒可期純熙百憂豈無那宵分氣轉嚴虎仁交光冷侵

座漫畫同信天盛鳴寒號得且過素心幸對牀泰來布

衾各僵臥飛夢尋江鄉昶細梅折千箇文蓮

九穆齋載酒招遊鄧尉探梅

溪雲林靄望中移曉起推篷面面竒閑客正宜無

事飲幽花偏愛半開時水邊煙動浮空影籬外香

來露瘦枝最喜謝公吟力健芒屨更擬續前期

元墓看梅

春山過朝雨翠色纔半露舍舟理輕策遠向煙中

去溪澗何逶迤幽尋屢多誤行行梅花林掩映出  
千樹殘凍猶未消冰雪破寒冱山靄雜花光濛濛  
不知處微聞幽香來獨立還久駐更誰齷齪前  
尋山不厭深遂造林間寺閑房無人來苔蘚生滿  
地曲折上高閣遙見湖波翠坐久聞寒鐘獨往轉  
幽邃偶然逢法侶欲聞楞伽字亦千箇  
企晉升之琴德遊鄧尉賦寄  
筍輿栗杖縱登攀惆悵君遊我復還崦裏千叢花  
散雪閣中萬頃鏡涵山幽尋烏鉢浮嵐外遠挹青

芝淡靄間儻見故人題壁句和成相示一開顏

席上贈歌人四首

暖屋紅牙靜夜分  
褰簾爭舞鬱金裙  
十年載酒江湖客  
能向花前幾度聞

蠻鞞珠襉映羅襦  
縮髻塗妝意態殊  
絕似中丞筵上見  
梨園弟子李仙奴

三更絳蠟盡成堆  
絃撥仍教側調催  
聽水聽風渾不辨  
祇疑天上紫雲迴  
花月歡場計總非  
傷春傷別夢依稀  
樽前多少天涯淚  
偏到聞歌易滿衣

西齋如存和  
卷六  
六  
送企晉之天都

春風搖艇入新安清絕遙連五百灘  
屈折松明尋古渡嶙峋小華問晴巒  
有時平地砂泉沸忽見參天石  
筍寒料得浮丘早相待好持絳節控青鸞  
苦雨懷升之琴德往雲間

愁霖連夕結陰霞悵望分襟遠夢賒  
有約相過剪春韭那堪獨對落檐花  
五茸雲起迷遙嶂三泖潮平放短槎  
何日通波亭館裏對牀歌枕話天涯

飲蔣奕蘭宅

銀燭湘簾映綺寮主人投轄興偏饒  
小槽滴酒飛三雅側調傳聲抹六么  
夜永未愁蓮漏急春殘先怕杏花飄  
明朝醉帽衝寒去又跨青驄折柳條

姚處士村居即事

濃綠陰邊溪路長攀林蹋閣恣徜徉  
平橋樹隱和岡市細雨潮迴顧浦塘  
隔岸秧針齊刺水弄晴麥浪漸吹涼  
江村不厭勾留住隨意歌眠六尺牀

崑山道中

西鹿城邊碧幾灣樵風放舸足開顏  
綠江雨暗千家樹近郭雲埋一塢山  
蜻蛉自吟仍自止鷺鷥飛去又飛還  
何時小隱滄波上徑結松毛屋數間

西華女不稱  
卷六  
去又深夏日過石湖  
蒼茫煙水失炎蒸  
柔櫓輕帆興可乘  
急雨過時千  
點鷺野風涼處滿湖菱  
橋通別浦晴雲合影倒羣  
峰晚翠層凝想昔賢  
棲隱地江鄉幽興轉飛騰

一雨纔潑火羣星亂撒沙  
苔深澗戶寂暗墮石楠  
花

題友人別墅

斯人臥雲壑十畝成幽居  
不讀貨殖傳愛鈔種樹  
書齒齒石抽筍灑灑泉鳴渠  
何時劖靈藥同把金

鴉勸

同琴德來殷復遊滄浪亭

百頃風潭草樹濃石棊盤在  
有遺蹤好攜北郭詩  
人伴重聽南禪煙外鐘  
日暝滿川喧驟雨檐虛寸  
碧出遙峰釣船擬約浮家去  
袂衲衫輕手自縫

晚過芙蓉湖同琴德來殷作

輕舟如葉趨蓉湖湖寬匹練光  
平鋪虞淵日落懸  
火珠遙天四合紅霞敷  
急槳劃破琉璃壺  
霜風獵獵翻菰蒲  
鷗鷺鷓鴣鳧鳧得魚意與漁人俱  
湖心老翁白髭鬚  
縛茅堅坐誰爲徒  
此景志和天隨

無少焉皓月升東隅銀宮貝闕開仙都姮娥跨蟾  
凌波娛冰肌雪骨凝脂膚光射燿燿驚天吳乍離  
乍合神姿殊晶瑩盪激輝迎矚船頭賞玩容跣趺  
清露夜滴衣裳濡拍手大笑相喧呼我曹漂泊流  
光徂結荷水宿羈長塗幸偕冷伴忘飢劬睽孤乃  
得逢元夫榜人解事傳巴歛爲我舵尾炊雕胡圻  
泥倒甕澆腸枯好景得句追亡逋夜久月黑雲糝  
糊細認港汊停征艫合眼有夢凌夔巫時予自楚中歸

長橋玩月

長橋五十三虹影浮鏡面一橋月一鉤竒絕珠一

串

舟中夜雨

倦柳衰荷易颭風荒江嘹唳斷征鴻可堪酒渴燈  
昏後幾陣淋浪雨打篷

題西陵女士方芷齋詩卷二首

掃眉不櫛有誰如香茗春椒灑翰初試仿簪花裁  
妙句寸縑堪敵百碑礫  
西子湖頭面面山書牀鏡檻鎮長閑最憐吟思清  
如許翠袖天寒修竹間

追悼趙飲谷李碩夫沈冠雲諸尊丈

承平者舊盛中吳世外忘年得我徒話雨相從臨  
頓里尋秋並載女墳湖少微已掩風流盡蒿里空  
悲歲月徂此日車過餘腹痛獨將清淚灑黃壚

和沈歸愚先生黃山四面松歌爲家盤溪

盤溪能事寫古松尺幅蟠屈雲嵐重寫松好松有  
松癖種松愛翫綿春冬我來郭西忽相見階前刺  
眼奔乖龍香泥細護大邑盎森然黛色成煙叢槎  
枒蚴蟻周四面嘉名新錫歸愚翁細看松根裂石  
罅松色乃與石色同松取石取兩奇絕彷彿造化

寧人功主人爲言移致處乃自黃海仙壇中軒轅  
鑄鼎未成日此松已自盤龍菴昔賢五鬣詫異事  
未若四面標靈蹤他年與君騎紅鶴茯苓同煮丹  
臺峰

蘆花次蔣升枚韻

離披一片澹秋煙卻趁西風作意顛亂舞斜陽疑  
撲絮閑飛野岸忽堆綿銜來雁度清霜影吹去船  
依淺水邊我亦天涯蓬轉客飄零共爾一淒然

香椽次徐寧寰韻

別種江鄉重橘田山家爭摘晚秋天黃團繫處香



偏遠白定裝來品自妍每到嚴寒封蠟蒂最宜遙  
夜伴茶煙笑他兒女誇新樣綵縷低懸斗帳邊  
小效水龍南廖君楚崖令嘉定出所著詩集見示  
對客題贈二首  
西江宗派幾家分管領湖山併在君春水一蓑吟  
釣雪秋嵐兩屐醉穿雲細縑冰繭心良苦清映芙  
蕖格不羣何日金精峰下路相從拄頰共朝曛  
騎竹兒童喜欲顛爭看露冕向江天神君共說兼  
慈父才子須知本散仙吏放早衙琴有韻鶴調小  
閣月初圓風流茲日誰能似美政應同好句傳

西莊  
寒夜同吳企晉趙損之曹來殷沙斗初朱  
德基家存素琴德集家盤溪停雲齋分得

靜字

江村農務罷無事動清興素心偶相邀訪舊入幽  
徑夫君敦雅懷圖史寄閒靜點筆寫雲山意匠入  
神境濁醪時勸客沉醉不願醒須臾初月升轉見  
水竹淨攜手步霜林松雪翠相映茲樂良難期共  
和滄浪詠

東晉早客舍同琴德夜話

摩天黃鵠竟誰依逆旅相看萬事非白社逃名欣

有伴青燈感舊意多違愁聞故宅荒松菊苦說耕  
農有旱饑今夕酒闌重不寐細論身世各歔歔

味餘歌

西莊始存稿卷六



